

摘藻堂四庫全書薈要

集部

欽定四庫全書薈要

集部

御定歷代賦彙補遺卷十八

欽定四庫全書薈要卷一萬七千三百九十九

集部

御定歷代賦彙補遺卷十八

言志

求志賦

有序

元  
袁裒

以賦托志或比擬賢哲或寓情幽怨或述已出處

若愍志復志述志之類非一大抵皆假設仿喻依楚語  
屬辭余老於憂患年垂耳順白首無成因想先世遺業  
敘次為求志賦其言曰

稽胚暉之攸淑兮肇啟迹於虞嫺逮流肩於公滿兮實  
楸衍於大姬爰錫胙於汝潁兮廣采壤於餘支及嬴項  
之蹶仆兮通宛洛之說辭固守儒以卒業兮闡炎漢之  
由儀鍾厥美其帝傳兮暢奕葉以演迤歷東都之縣邈  
兮終江左而隆衰清風邈其復振兮參王謝而並馳粲  
抱道而質義兮徇石頭以燭夷誼推本以篤烈兮謂貞  
信之在茲世悠悠而遐迴兮竊譜牒之莫推跡芳馨之  
所由兮劬隴畝以為基值文明之泰亨兮奮德義於海

陞汜登名於太常兮翼時彥以驂駢振英風於句越兮  
雜榛蹊而闢之聯魚符於南北兮敞家聲以騰輝方渡  
江之中阨兮興禮樂於浙瀋濬伊洛之鴻源兮本沂泗  
之宗繫始揚武於鷺雍兮嗣冠名於虎陞挺正色而不  
阿兮粵忠謹乎繼世佩太阿之森鉞兮士佞嘆喑以匿  
避激淵淪於頽波兮從喑鳴而獻歆黯抗言以疏遠兮  
弘曲學而高位卒滔滔而莫返兮竟奄冉而淪棄悼蕪  
城之荒蔚兮莽荆榛之翳蒼山川鬱其嵯峨兮俛榮華

之銷瘁耿脩名之炤焯兮齊徃哲而超詣乾坤倏其凌  
薄兮儼陵谷之變遷盛衰渺其難堪兮何興仆之後先  
駕方舟於弱水兮刊畚鍤於石田躬勤瘁以畢歲兮挽  
吾輶而莫前造窮山之崔嵬嶽峯兮鄰豺虎之嗥突覘  
贊汲線溜於荒谷兮刈菽藿於墳衍離阨阨於嬰稚兮  
紛俶擾而迤蹇覽古人以為前兮徵徃轍而訊驗仲翁  
俯首以綰綬兮望之落落以抱關衍秉剛以放逐兮永  
默默以名宦閔仲翔之通筮兮屏南郊而不返既昭塞

之有時兮縱余情而舒卷迺鷁退而蠖伏兮寄余懷於  
編簡宵營營而無寐兮精炯炯而申旦縣朽綆於智井  
兮悵羸餅而三歎兮橡栗於羣狙兮心倉惶而不伸涉  
江海而行邁兮追奔驥之飛塵羌骯髒而寡與兮若昧  
瞶以問津忽荼毒其重罹兮哽顛連而悲辛髮種種而  
既童兮齒零落而輪囷叩辜愆於蒼昊兮雲漠漠而奚  
噉躡九死而一蘇兮屬微息之僅存契靈龜以貞卜兮  
墨未食而已湮卒罔罔而迷適兮掩余袂以霑巾謂玄

化之窈冥兮爰屏肅乎營魂形彷彿於噩夢兮喻至理  
之所循俾內省於微躬兮曷怨尤乎天人既爾生之榮  
确兮褻四體而靡勤仰哺啄以尸居兮媿胼胝之鰲黔  
下不能以傭力兮上不足以奉承乎大君徒內壘於願  
欲兮宜外劬於甄鈞觚不觚而靡用兮固宣父之所云  
挾章甫以賈粵兮遇侮慢而誰因波漉漉而東駛兮日  
瀏瀏而西輪睇修途之邐邐兮飲余馬乎江瀕佩脂韋  
以假飾兮顏屢頹而已沮日愀怨以流盼兮心壹鬱而



誰語緣微徑以板援兮察愚智於今古蘭芳馨而自炳  
兮松流膏而斤斧膺厲節以殲類兮蟠渾渾而容與登  
長嘯以夷猶兮康皎潔而觸悟威抃舞以委誠兮耄失  
節而罔措徵執中以事讐兮色侃侃而愈嫵諒合散之  
靡常兮豈得喪之有數委吾形於大順兮昭惠迪而內  
顧踐康莊之夷軌兮黜健羨而罔慕頤天真於玄玄兮  
鍵靈關以為固尋至道之所歸兮去性根之蝨蠹念英  
葉之難再兮惜吾年之云暮全所守以解驂兮結余轡

於馳騫逍遙乎無為之園兮采芝英以甘茹滌瑕垢以  
保躬兮依名德之為據寄遙情於冲漠兮將弭節乎  
藝圃激玄冥以漱潤兮伏神雀於丹淵掉蒼龍使騰蹕  
兮執白澤俾潛藏御颺輪以登太淵兮叩招搖以周旋  
輶池之縹醕兮與大椿而論年嗟舜英之卒卒兮徒掩  
抑於逝川精銷委以駘鷁兮玄頂忽以白顛惟守中以  
返朴兮詎索隱之是專矚雲霞而游目兮味泰和以自  
堅屏紛濁以純一兮却智慧而俱捐警夙宵以康神兮

祇吾性之所天既命義之齟齬兮置休戚於自然泊虛  
舟於回渚兮逝將返乎故土問耕鑿於沮溺兮綸陵陽  
之網緒食所力以保終兮企優游於末路希幼安之靖  
共兮濯清冷而遊豫風颯颯而淒厲兮凜蒹葭之霜露  
蹇躓豈其願兮摧輪亦吾所深懼求正志之所蘊兮庶  
無忝於祖武亂曰已矣乎吾誰適與歸荆塗莽莽曰耘  
治兮灌溉根芽長茲茲兮守質養素不傾欬兮外息驕  
吝內自怡兮明明在上毋我欺兮超然而存無所為兮

誠心不疚允坦夷兮

蕭齋求志賦

明

祝允明

斐然自尚者亦靈區之助歟匪閔邱兮絕世猶先井兮  
攸附帶邇郭兮成構挹遙垌兮為趣雲岑列兮縣邈芳  
洲緯兮縈互囂聲止兮層垣幽風暢兮洞戶碧羅交兮  
施宇紫萼團兮繡路虛泉鳴兮漱除淨壁晃兮瑤樹宵  
竹鏤兮黃月曉松沈兮蒼霧露疏蕃兮璇綴霞標建兮  
錦傳擷芳馨兮蓀茝玩趨臭兮麇兔肆珍圖兮高張敞

嘉名兮特署爾乃登丘陟墳沈章漂句寶蔡子兮祕笈  
侍房君兮豐庫流璋琬兮華琢絢星河兮森聚苞周紘  
兮廣獵泝真源兮孤赴測潛機兮太冲懸皇鑑兮鴻素  
抗五大兮齊襟拊百氏兮獨步攬萬化兮棲臆操三才  
兮在馭於是謝將迎遺倡和任簡傲安晏惰九域蟣蠊  
萬類洩唾或同心兮晨集羗佳人兮宵過蹇淹留兮夷  
羊聊從吾兮妥隨攬蒙瀨兮齊塵侍周孔兮末座平伯  
禹兮後降補皇媧兮餘破摩丹霄兮鷄運函玄珠兮龍

卧乃歌曰浮青陽兮蕩素秋日月居諸兮與化同流今

我不樂兮乃將焉求歌已爰命樂童陳浩倡奏元間鳴

清商極變聲兮靡曼陶淫思兮太康余乃掩抑衆律孤

引圓吭凌青旻以飛嘯兮揜衆音而不揚操皇雅以獨

鼓兮寫神襟於混茫忽白日兮晝冥振衝颶兮襲堂川

鱗躍兮出潛霄翼接兮不翔吟九淵兮神蛟舞千仞兮

文鳳騰江河兮擊春盪泰華兮低昂斯時也獨御正陽

高犇物先呼吸罔象遨嬉泰玄與神明兮乘居視蕭蕭

兮墨然

感志賦

元  
李好文

何天地之寥邈兮眇予生之有身履黃坤之博厚兮仰  
玄覆以無垠鑄衆金於大冶兮偶形留夫粹質苟莫邪  
而弗自砥兮固鉛敝之所同服蒙予若之倥侗兮承鞠  
訓於自宮佩非善而罔繫兮服非惠而匪躬肇革之申  
申兮鞘余觚之容容擷秋圃之日精兮濯淤漣之荷華  
卻穠李而弗御兮矧猶臭其焉加歲翩翩其不居兮首

元服以及冠恐固陋之挾余兮門面牆而無見思假道  
於書林兮求孔氏之高明遵文衢之逶迤兮愈多岐之  
縱橫昉懞恍而莫適兮從文公而徵詞曰爾神潛而志  
栖兮終必達夫所期果服言以從事兮羸十年而戾之  
覽天庭以游目兮又欲窮夫四遐觀百氏之原委兮究  
異說之貞訛泝太初之無始兮循三王之不頗總條理  
於一聖兮固馴致夫中和汨余有志於古人兮懼脩名  
之嚶嚶忘漆雕之自信兮懽學優之有得謂青雲其可



力而致兮謂時命之可弋較余行之吉日兮遂觀國乎  
上京指閭闔以徑注兮奄長風而北征眩天都之雄麗  
兮非下土之能名信魚龍之所混并兮亦名利者之為  
場余既初無赫赫兮又何適夫煌煌翺捷步之高才兮  
豈扶服之能躅挈桔槔之頻仰兮恐祈榮而離辱夫何  
衆之熙熙兮我獨約兮而為德資章甫以適越兮固前  
修之所為惑飡玉羞以燎桂兮囊日索而焉留有東昏  
之故君兮盍歸來之為謀浮輕舟以南下兮亂海浹之

交流返敝廬以窮處兮迄於今一紀其將及晝于茅於  
南畝兮宵索綯而未息傷鵲鵲之原居兮慮鴟鵂之無  
室遠子荆之有美兮羌終棄乎草澤余非昧而至愚兮  
誠有徵乎前哲聞耕穫於道德兮內懷寶以自珍豈畎  
畝之足樂兮閨閭漠而無闐音樊須之請稼兮乃獲誚  
於聖人摯冥冥其鴻飛兮猶釋耒乎有莘溺耦沮之不  
反兮又奚足與為羣悲此志之未伸兮秉經德之不回  
心飛揚而披離兮曷日夜而疚懷亂曰鹿之斯奔兮其

足伎伎河魚衝波兮乃窺其尾物終必反兮有張斯弛  
往不必求兮來者是竢庠不隨阿兮險不期詭貞途安  
行兮不易厥止優哉游哉兮於以自矢

定志賦

有序

明  
魏學伊

書曰詩言志班固曰賦者古詩之流也夫余遨墳典之  
園游先詰之衢舍魯奚適矣顧衆兆馮生各有攸驚根  
柢未定見物斯遷思以纂至人之餘徽繕厥初之貞性  
是北行而南其棘也必不幾矣老子曰不見可欲使心

不亂蓋亦自閑之善策與雖然土之塊然也入水則淫

膏之澄然也過炎則沸程伯子之喜獵而復明於十二

年之後也不見其可恃哉陸行而語人曰善沒善沒無

徵也浮江湖而不波則真善沒者矣袖手而語人曰奇

勇奇勇無徵也舉九鼎而不礪則真奇勇者矣尸子中

黃伯曰余左執太行之獲而右搏雕虎惟象之未與吾

心試焉試云者蓋假以自徵者也余故騁辭乎滔蕩之

場試情乎荒唐之域窮態極變嗜慾畢陳明晰者昏眩

貞確者淫放忽忽欲身試焉已迺收其佚思返乎芳躅  
澹然無營屹乎其不可移斯以為定志之章習非吳粵  
水亦不可浮也力非賁諸鼎亦不可舉也定志於既試  
之後者君子所以不輕待也定志於未試之先者君子  
所以不輕試也孟陬之旦抽斯言以為繩余其不摯勵  
焉其辭曰

歲協洽之始旦兮氣凜冽以淒淚雪霏霏其颼曳兮風  
澌澌而鳴厲庭木菸邑而無色兮春陽其猶未戾相烝

族之嬉嬉兮各怡懌乎改歲輪蓋巖其雲陰兮閭閻闐  
噓而陰堅士簇裘馬之劇觀兮女飭媮婧之纖製笙鼓  
嘈雜而狂會兮枌枌翕施以增麗彼時俗其固然兮亦  
良辰之可憇忝邑邑余紆軫兮獨鬱而眇歡攝提遷以  
遄邁兮汨赴阪之迴湍昨總角而象舞兮俄岌岌之高  
冠豈不諒晏虞之為適兮時曷可乎久盤昕皇皇其遶  
柱兮夕抱膝而永歎叩前修以內慙兮增烈烈之重寒  
彼駉駉之咫尺兮夙雄賁乎千里干將脫劍而契鐵兮

曾何需夫鈍砥禹龍躍而雲滂兮瑜虎嘯而颺起寧華  
髮之隨顛兮忽剡鋒之迅駛昔魏武誠鄆城兮道頓丘  
之無遺矢雖嶮夫匪攸慕兮已森森堅其壁壘豪桀各  
有所締構兮疇不猛晉而惜晷咨非躬之溝猶兮足踣  
時而不前覲瑋迹而婁奮兮怵長路之繇繇曰姁節其  
可好兮羌發軔於髫年窳氓奢覲而苦耕兮莠驕驕於  
甫田糾余生之步履兮洵重誣而貶譽辟仄徑之幽隘  
兮杳窅而不覩天翫媚俗之追曲兮辟踰踰以嬋媛文

好顏以為媼兮匪余心焉攸便遂肆志而橫驚兮教廷  
頽而不遷謂彼原我獫兮蹇宜溝此迤邐盍反性命之  
眩潛兮我與彼其俱然湛芳蘭以鹿醢兮越三年而易  
馬或厥根之漸滲兮僉委寘於中野吾誹蘭之不馥兮  
豈芳草之尤也謂九畹可勿樹兮充幃之羞也滋德行  
以竣楸兮願及年之方華辰漸冉其逾逝兮懼霜雪之  
浸加蹇余隋急以成性兮羌心疾乎浮兮任顛替之予  
子瑜不琢而為瑕繁弱之洞堅兮資排檠而體正儀狀



睡其齊觀兮庚增飾而俞靚夏前詰之不羣兮聿矻矻  
其抗精疇怠荒而隆伐兮孰消搖而躋聖豐牆境下兮  
恐行潦之阤崩菜林淺根以浮垓兮焱風吼而上扔蒙  
鳩編髮以為室兮奄焉喪其所馮馮生總總其靡定兮  
展余心之所懲余既懷此眇思兮冀雪焉豁其蒙蔽修  
途迢遞而亡鄂兮余乃夢夢其未晞紉留夷以為帶兮  
緝胡繩而為帔願衆芳其繁廡兮還蔡莽之螫厠茲只  
尺吾弗曙兮矧出門之數蹶焉猶豫而廓處兮將謏謏

以永世誕周流覽觀以財擇兮余乃知吾所憩脂余車  
於家巷兮秣余馬於道周亂余輿兮容裔攬余縑兮夷  
猶神惺惺以惚恍兮行極目乎中州睇闐闐之囂擾兮  
各營營而有求津要雜沓以叢穎兮紛勺灑其綢繆歟  
焱聲歔之燁赫兮訇訇轂轍之殷稠遭時而適志兮競  
侈侈以忘憂聳層臺之將將兮駢雲屋之爛爛蘭橈埽  
塹以交錯兮桂棟曼衍而炳煥飛檐崑崙其矯起兮彤  
軒爽塹而皓旰絳雯斐疊以翼櫺兮杲日射䟽而粲與

砥室繽紛其致飾兮琦璜雜璘珉而零亂目迷青蔥與  
頽素兮曾莫殫其珍玩美參霄之臺榭兮又羅花木之  
芬芬薰風習習其拂袂兮桃李爭豔於春陽憐芍藥之  
妖麗兮佩蕙茝之幽香楮榴噴而然階兮汜菡萏於池  
塘芙蓉綽約其臨流兮菊英矯潔而凌霜梅抗雪而揚  
葩兮百卉不敢與詡詡周亭渚而徧眺兮爛菲菲其流  
光余聊絕夫嬋序兮展更僕而不可詳既辜攬之娛情  
兮又杯筯之好合淥醽醁以醕酢兮蘭肴烝而迨逌孰

熊蟠之鮮臠兮烹豹胎之煜爚旅臠蟪及肥腴兮兼炮  
羔與鷄臠揉黃蘇與露茹兮調葢羹而先鬻蠶醢醢其  
蟻浮兮分牙籌而司酌衍芳顏之微醺兮忽女樂之雜  
噉竽瑟淫淫其繁會兮賁鼓震動而鼗鼗新聲參差以  
迭奏兮謳與歆而交囂衽褊褊若交竿兮樂妙舞之翬  
翬華袿飄颻其從風兮羅襪躡蹠而逡巡儵鴻翥而鳬  
沒兮曳繭緒之糾糾歌與舞既酣悅兮客酩酊其徑醉  
蘭膏熠燿其逾明兮紅妝陞坐而無次嫫眼眇其騰光

今聯曾波而遺視雜杜若於輕裾兮握纖手之芳膩眉  
連娟以繚繞兮腰嫵妙以佻媚申厥好於九秋兮勿隕  
情以遐棄魂忽忽以搖蕩兮孰桑門與展季窮聲色之  
湛樂兮羨滄海之無期聊遨遊以愉快兮俟河清乎幾  
時余聆茲靡靡之瑣說兮忽亢志而長思初旦旦有成  
言兮曷回睟而自嬉不見金谷之遺禍兮誰樂極而不  
衰士幼服先民之炯戒兮咸敦勗以自持出艷繁華之  
可者兮意默默其浸移朝愍黨人之涵沒兮暮褰裳而

就之還訕介士之特立兮長鷗領其何為曰吾豈涉而  
遽汨兮聊與之逶迤醉夫自為醒兮旁觀轍然而相嗤  
余不忍厥躬為嘗試兮夫安能乎留茲遭吾道以遠逝  
兮正余策乎徂征僕夫喃喃其詢評兮馬裴回而不行  
既舒節而遂晉兮相余心之所明苟蟻蠊其可浮兮詎  
駛駢乎丘陵枯槁非足尚兮亦云企夫修能去琢蠹之  
既遠兮俵俵其焉憑歷闔閭而諦覩兮余馬且焉止息  
何土習之壑慄兮云游俠之所域好傾身而締交兮集

輕詆之奇客美賓從之姜苴兮張威聲之赫奕冠劍紛  
紛其從衡兮珠履晶瑩以千百鳩俊桀以巷飲兮笑肝  
膽之不隔雙耳熱而長嘯兮須髯豎而如戟或尋槿與  
扛鼎兮或投壺而呼白既蹴鞠以漫戲兮又分偶而拊  
射窮鄱陽之暴謔兮輕千金之趙璧攬於菟之重裘兮  
橐蓬門之烏號左夏服之勁箭兮右步光之霜刀縱晨  
風以馳獵兮燎千里之蓬蒿颺礮飛而蔽天兮豺狼驚  
而怒嗥氣歎勃其不懼兮拉魑魍於窮皋踏深雪而夜

歸兮呼美酒而烹羔躍馬顧眄兮誇一世之雄豪召屠  
亥使麾鉞兮呼漸離使擊筑滄海忽其碭駭兮慶卿因  
之痛哭持牛炙而啗政兮解佩劍而贈育朱家嘻布之  
髡首兮要離誚訢之眇目招原朱於二陵兮各意氣之  
相逐忽中宵叩門兮號胸臆之不平柄人哮闕兮姦人  
猙獰戚人肆毒兮生人食盟中憤憤其憑怒兮訝烈焰  
之橫生彈丸發而巨讐殛兮杳莫蹟其姓名抑恂恂罔  
德色兮沒齒而不自鳴嗟夫人之慷慨兮殆燕趙之風



也亶聲聲其磊砢兮然狙獪之雄也睚眦蠆芥兮忽肆  
諸路隅交遊罕擇兮禍發於錙銖萬乘恣其凌轢兮悲  
厥終之可虞馳余興吾遄發兮羌去去而弗顧士趨趨  
以跖弛兮鮮不軼乎常度壹睢盱亡檢柙兮良古人之  
所惡志擔矯以亢厲兮覽八極而尚羊曩蓬矢之俶縣  
兮肇有役乎四方長湛鬱其弗舒兮偕秋草而萎黃超  
拂拔以遐騁兮牧余駟於邊場戈鋌林立以彗雲兮旗  
旄飛颺而拂蒼散貔貅於虎落兮聽鳴鏑而夜愴彼越

甲鳴吾軍兮竊憤醜虜之跳踉壯夫生而燕頤兮死馬  
革其奚傷震鬱怫以渫怒兮目閃爍而揚光吾願上關  
威弧兮落層玄之欖槍戲下煦煦其挾纊兮又慄慄如  
負霜士魚休而鏖戰兮曾莫抗其顏行鯨鯢擣以成觀  
兮豺虎礮而催藏天驕絙於塞外兮適威名與俱長帝  
赫赫詔入關兮奏膚績而四覲閣棘傑僂其前列兮鉦  
鼓嘈囂而雷振猛士騰躍以彪悍兮玄蚪沛艾而奮進  
佩長劒之陸離兮肘累累之金印天子嘉乃成烈兮躬

敬勞其懋蓋玉歷頌於白蘭兮蜀賓懾而內賁東震日  
域之景國兮西壓月蝟之末脣陋驃衛之梨磔兮祗黷  
武而開轡虎賁固所容鞭撻兮屹長城之坐鎮余既難  
夫豪馘兮展永慕此崇功意飛揚不可以戢兮恐性行  
之瞢瞢毒龍矯其上騰兮海水沸而洶溶肆虓虎之跋  
扈兮驕豕躅於遼東憑不顧夫量爵兮奄抱慟於良弓  
或道醢之幸脫兮引猿臂而自雄顧桑榆之夕景兮忽  
回首而長恫東流逝以不返兮悵韋伐之俱空壯心頽

於麟閣兮託遠想於喬松旋余輶以徂往兮揭橐然而  
曾舉棄經營之擾攘兮求真人與之語願令介鳥前驅  
兮為通言於玉女意眇忽其臨雲兮望三山而延竚朝  
余發於中土兮夕余稅乎丹丘羽人踳躑其成群兮絕  
雰埃而宣遊郊神明以高麗兮朋精粹而為儔垂蛻蟠  
之離離兮總蚪旄之浮浮攬慧光而為旂兮揭招搖以  
剡流掣列缺之淫裔兮駕飛廉之颼颼望舒瞭皎其騰  
輝兮豐隆砰磷以彪休印旬始其密邇兮尚神達之可

摶怒戴勝有面懷兮合羣仙乎好會將祝融前效軫兮  
詔勾芒使展軼蓐收跼蹐以樹旗兮玄冥狂進以絳蓋  
紛紜鏗鉤轟以輶軋兮雜遝轆轤隱以硤磕烟煨煨煜  
闐以砢訖兮駢瞿跼錯以賴跟騰驤迭遡瞿以趯踔  
兮躑躅叫晷矗以淟霈青蚪赤螭蹇其夭矯兮焚焚衝  
從以奔駖忽清霞爛編其異采兮近仙侶之雲從揖岐  
伯暨倕佺兮跼羨門與韓終邀桐柏之王子兮攜南嶽  
之赤松既招方回於五柞兮又迎葛由於綏之潒誰卷

卷其緝御兮候金母於木公賓翩翩交集兮於茲焉舉  
觴屑瑤藥為饌兮揄瓊靡為糧吸沆瀣為餐兮斟玉醴  
為漿漱飛泉之微液兮咀石菌之華英列如瓜之巨棗  
兮采木禾之芬香眷明光之媿嫫兮咸欣欣其樂康賓  
既夷悅兮於茲焉式儻拚湘靈弄瑟兮使馮夷擊鼓子  
晉吹洞簫兮青娥為戛拊叩昆明之曉筑兮彈雲璈以  
琚槁歌太霞之妙曲兮裊餘音之縷縷耽清都之節族  
兮長無極以終古余竊樂此眇界兮迥異乎曩之所陳

聲色沉濁以冶蕩兮茲獨沕穆而渾淪心泚泚其浩曠  
兮愴委佗以怡神駕白鹿余濯髮兮乘黃鶴余晞身載  
青鳥陞閭闔兮狎紫鸞之馴馴登閭風又微問兮儼無  
始而為鄰餐六氣以遐騫兮焉熊經與烏申驟噫鬱余  
怊悵兮悲滄桑之數變木羊躋而一足兮紙驢碎而成  
片石橋梁澌以灑沫兮銅柱坳圯其如綫紀崦嵫與暘  
谷兮經咄嗟而忽徧竊聞令威歸遼兮蘇耽返乎故鄣  
屋廬夷為鹿場兮椒壁荒而存壁白楊蕭蕭其嘶風兮

枯柏陰翳以連卷鬚豎彎弓以彈射兮爰飛鳴而悲吟

展悽惻其若茲兮又何長生之足羨徐生入海兮五利

以為師攀龍髯之蜿蜿兮射魚鬣之狝狝雞犬不獲偕

升兮卒聖賢之見哈豈徒誚其眇成兮實心咎其貪癡

道坦坦其平廣兮固喬怪以炫奇靈臺渥滑以不守兮

胥日用而耘之余焉庸此詭誕兮祇貿貿其狂馳泝蓬

壺以迅征兮策余服乎吾將反逕有倭而難循兮理有

眇而匪遠羌昕夕與食寢兮余乃哀驚而旁遁速黽勉



以遵路兮趁曜靈之未晚既律嶠其遄歸兮弛吾轡乎  
故閭彼紘紘祗攪心兮冲舉又夸虛攝浮氛以復正兮  
屏萬慮而獨居東汎剽之纖慧兮信印志於古初羌焮  
掌而樞精兮密追琢其琰璵逢萌視恐或賈兮敢惱慢  
而跌諸螾罔爪牙之犀利兮穴槁塹而為居蟹二螯又  
八跪兮顧曾螾之弗如余乃寤夫繕修兮厘夢寐之拮  
据椽中貞為基兮葺禮儀為廬築沉深為冥兮豁神識  
為疏蹇憔悴印弗憚兮跂往聖之高衢慙余質之凡鴛

兮單千百猶未迨望平原而勇趨兮猝遭躓於危嵒意  
蹙蹙若有所懲恣兮忽又事去而忘改漫搥筆以雄視  
兮矜文章之五彩綜綺縟之粲粲兮映冰壺之皚皚啟  
汲冢及西巖兮固菁華之所在漱羣芳之津潤兮振麗  
藻而奇侅頽墳索以誼形兮雖蓬垢其弗悔謂顛顛喪  
厥志兮戎相尋於罔殆閔醯雞而發覆兮徒與鼃乎語  
海余願歛華而為實兮先樹本以為華扈尼訓之睚睚  
兮株繩墨而不柰剪蓬草勿繁翳兮俾昭揭於坦涂循

茂則而忽悟兮超永逸乎濃窪曦皦皦其中天兮何隨  
侯之照車堅卓犖之貞性兮又善劑於中和剡靈光其  
內葆兮允融洩以婆娑亡憤疾流俗兮局蹐為小儒蠖  
詘曲以局身兮蟬駢翼而長臞彼鸞鳩之譏陋兮惟榆  
枋之與俱勿恢張蟲伎兮凌厲乎九區烏惡美羽而句  
啄兮魚畏哆口而垂腴憫文豹之來田兮詎華采之不  
殊鳳凰翔而翺翺兮應龍陟皇之赫戲闕芒芴以隱見  
兮妙變化於有無瞻羣族莫絜遠兮謔印志之攸圖筴

夸父之捷步兮堙瀚海而博塗  
矢余願固却顧兮羌弗  
病其為迂亶厥躬無離詵兮  
吾獨征乎又何需歌曰風  
憾憾兮薄寒雪翁翁兮萎柯  
偈辰光兮迅邁蹇蹢蹢兮  
蹉跎閑衡門兮浩歎疚余心  
兮實多載歌曰遊思盪兮  
激昂俶踟躕兮徬徨涉嶮谿  
兮愴怳眊經塗兮周詳誰  
與余兮同好余將往兮褰裳

閔志賦

有序

明  
謝肇淛

謝子既嬰塵罔留滯齊魯之鄉  
心煩意適不知所為傷

居諸之奄逝感草木之變哀老期將至勲業無成惻然  
不覺涕之無從也迺作閔志之賦夫小雅怨誹而不亂  
楚騷眷戀以自貞敬通擯棄於明時小邴滯淫於末秩  
平子幽思安仁閒處每攬昔人興感之由其致一也要  
以幽憂之疾鳴而不失其正故言之者無罪而聞之者  
可以風焉其詞曰

繫崧嶽之降祇兮帝元舅之委嫗戎良翰於南甸兮皇  
祖荒於海濱亶歐冶之扶輿兮鬱五丘之靈龜強圉麗

於單闕兮惟大晉之將晦紛衆芳之墜落兮羌余蛺蝶  
而下界遙匍匐其岐嶷兮又重之以姣好繁凝脂以朱  
楊兮爰嬋媛於襁褓余既滋江干之杜蘅兮復藝脩岡  
之蘭茝渟湘沅之漭湯兮歷九疑之塽塹秣予馬於星  
沙兮弭予轡於熊之隗夕容與於衡皋兮晨迴翔於岫  
嶰峨吾冠之切雲兮曳赭霞為余履晞余髮於汨羅兮  
吊累臣與山鬼駟文螭以蹠蹠兮招搖咸池之躑躅殫  
遐矚於八埏兮羌一息而萬里紛吾既有此修姱兮又

內飾而秉貞既濯淖於塵滓兮揚陸離之奇文衆諭訛  
以骯髒兮曰余度之孔洵夙微尚之孤潔兮中徬徨而  
自敦彼鵠鵬之搏扶搖兮蜩鷲姍於尺藩伊九皋之警  
露兮炯一鳴而聞天脂余牽於吳甸兮緇余服於燕雲  
紫薇歛而中開兮馭閭闔之緇氛霞旖旎離以髣髴兮  
虹橋滅汨而便旋粲駉耳以先路兮驂玉蚪以承輪吾  
使豐隆撻鼓兮玄冥霰霖而灑塵敕羲仲使控組兮尊  
收澹濤而解愠玉女要眇以遞進兮笑靨輔以承權綺

穀纖以煜耀兮搖迴風而弗任托蹇修以致詞兮願結軫以褫神羌吾恐年歲之遲暮兮怨三秀之既愆指九天以為正兮矢沒齒而弗諼蹇芙蓉之翠裳兮紉羅炎之秋衣剔梗梓與檠柘兮夷薈蔚之資施芬揭車以盈把兮擷素馨之留夷衆女申申以市艾兮既娼榘余之蛾眉怙多汰以比暱兮又嫉余之修詞青蠅營營而播穢兮璆璣黥而黥點謂嫫母姣兮謂夷光媼使鉛刀割兕兮匣太阿於園扉纖離伏軾兮欸段先之摩尼坳埜



而不御兮積魚目而重綈曰余既繫於金梃兮羊腸瘁  
麕以欽歆竄窳電瞋以磨牙兮魑魍牲牲而躩踞玄蜂  
若象兮長蝮結蟠而屈屨甘余肉之乾腴兮齧余骨以  
為餐蜮趨踉以含沙兮射余影於湖之涓涓摧拉以震  
盪兮重跪以靡夷恍銃雷以礮磕兮天柱折而東排  
彼共兇之圯族兮胡岳牧之疇咨崇虎魑而撫仕兮逢  
干烙而斧鉞平既放而槁馘兮胥湛僂於鴟皮吾豈不  
知屈蠖以存身兮衡而莫之舍也爰蘖木以惴惴兮亦

惟修姱之故也衆習習以鑠金今天不辰而憚怒日月  
不照余之鄙幽兮羌獨佇乎中露伊直道徧徧兮夫焉  
三黜而改度箕不可以簸兮榆不可以食畢焉掩羽兮  
繩焉糾而代結繫輶張而自衡兮又何殊兔絲之與燕  
麥謂九霄高兮余躬既跼相彼厚土兮足靡容而跼跼  
紛逸蹄與廣輪兮競晨征而宵服中忸怩而迤迴兮恐  
疾行之無善跡鳳凰翔於高梧兮爰鋟羽於篋棘龍魚  
服而離罕兮固螻蟻之所搯彼隍中之蕉鹿兮疇云夢

而匪覺粵塞翁之亡馬兮曷罔求而卒獲維禍福之弛  
張兮譬倚蓋之糾繆孰退而為進兮孰爭道而顛蹶於  
皇天之有赫兮鑒下土而靡忒衆仰眎其魯魯兮卒勝  
定而靡克世既溷余之獨醒兮縱饋酤其焉益荃不察  
余之微忱兮任窈窕之繁飾苟余心之自諒兮寥冥冥  
其何弋居諸忽其不奄兮夏與秋其遞將鴻嘹噉而南  
厲兮露儵零而成霜蟬嘒嘒而夕悲兮卉木黃落而既  
盈鵲鳩之啁啾兮心含悽而中傷緬青陽之不復兮哀

戰寒此衆芳攬叢鞠以掩涕兮沾余襟之浪浪吾恐良  
時之不我與兮睠美人於一方氤靄鬢鬢以恍恍兮白  
日霽霽而無光飈飈慄慄以澎湃兮沙礫紛飈而飄揚哀  
故都之日邁兮歲序晻晻而電驤驚朱顏之倏改兮玄  
鬢塵而既蒼曷鼎鼎以折折兮悲余心之猶蓬撫短景  
之不留兮顧身名之罔藏夫何脩夜之繇淪兮漏淵漆  
而未央釭明滅以宵芻兮蛩蛩唧唧於頽牆魑魅瞠以  
盱窺兮玄鼯齧齧而跳梁感余夢之靡成兮攬蕙帷而

彷徨朝余稅駕於崑崙兮晡濯足於弱水馳遊驂於大  
荒兮卸余屨於濛汜余與化人飲白鵠之血兮天孫衣  
余以七襄之綺餐瀛洲之玉塵兮吸沆瀣之雲髓安期  
導余以上征兮躡浮雲之旖旎紛霓旌之藻綵兮列宿  
煜燁而纚纚祝融扇余以薰風兮戾太清而爰止閭闔  
砰礧以威蕤兮繚金果與瓊妃支旗翠羽蛟虬蟠兮絢  
虹梁之紺陸熊虎後貌翼以交鉞兮瞻黼座而稽首悚  
肅拜以陳詞兮偃弁栗而喪所勗少艾之結束兮秉先

民之大猶式古訓以自淑兮意燕婉而好修溘瀟落以顛越兮策高足而末繇目瞑瞶以黜沕兮神淫佚而慘怛吾不能西迴七曜兮寒春而溽秋不能耳視而目聽兮陸大壑而濤崇丘翔不能六翮兮潛不可以泳流憫余初之未遂兮孰牧后與之巢由高居而不復兮列缺執余以仇仇余既怵胆而弗申兮重憂慢而離憂聿秉度以遵晦兮絜筵筭而楮龜靈氛嘉余之中誠兮兆告余以吉繇曰天不可違兮道不可斁運不可方兮變不

可識肆陰陽之鼓鑄兮孰知其極伊萬有之亭毒兮互  
榮悴而遞易孰成功而不退兮孰夢華而不實孰處亢  
而靡悔兮孰既豫而不革或由升而遘困兮或由利而  
求復伊重華之徇齊兮茹草糗而庸陟說胥靡以植菑  
兮舍版築而爰立姜緱綸於磻溪兮卒鷹揚而諒發嗟  
孔轍之皇皇兮涕西畋而頓躓歌鳳衰以接輿兮劇虎  
牙而見跖斯西行以辭荀兮訖蹈榮而湛族條鄧胙土  
以席恩兮卒貿貿而溝瘠汲卧淮以政清兮湯尊顯而

弁僂雄既美其靈根兮曷懿新而投閣曾不如兩龔與  
逢萌兮身嘉遯而不辱繫彼東方生之突梯兮避金馬  
而玩辱疇云兩美其必合兮夜光抱而牘足疇云朽株  
之終棄兮輪囷玄黃而炳矚懷夙昔之歡豫兮歲冉冉  
而不復苦癡思以侘傺兮亦非余心之所欲省往讐以  
屏營兮中恬憺而曠獨惟大道之無涯兮奚好徑而處  
谷苟玄牝之長存兮安知蝸氏之蠻觸曰道為形根兮  
名為德車靜為躁君兮神為物樞夫唯聖人被褐而懷



玉兮羌吾有此瑾瑜苟寸心之罔軼兮歷夷險其焉渝  
脩九天而九地兮吾焉知其所如亂曰鴻濤泐礪巖岵  
岵兮天吳談詛豺狼嗥兮石室黯黯薪艾蒿兮已矣哉  
世莫我知莽滔滔兮西方美人我心勞兮蘭芷有秀菊  
有大兮無令荃瓊變為茅兮倬彼雲漢於回昭兮搏心  
抑志光自葆兮白衣蒼狗紛遊以翱兮自我眎之若鴻  
毛兮

抱貞賦

明  
石 瑤

帝降命之孔均兮聖作則其未渝紛世路之滉漾兮抱  
吾貞以自居遵雉柞之遺矩兮翦蒙茸而令疏車輶較  
而邁塗兮聽長者之所如被便嬖其綈繆兮疇不知其  
為美信出言之有章兮念禍門之貽悔欲周容以趣好  
兮豈前哲之固貴顧賦質之既偏兮外若裹其能悖彼  
麋鹿之在庭兮德雖老而未馴有山雞之孔武兮寧鬪  
死而不淪矢惟直以自信兮璧亦不知其白諒物理之  
各正兮有智愚之一德吾既離憂與患兮懼震趾之逢

尤將同羣於鳥獸兮又異氣之不可求思大人之遠遊  
兮雖騁駕乎六合終回翔於故都兮飽湘流之一勺乾  
與坤其並運兮咸得一而清寧維周柱之遺史兮抱無  
名以為經覽萬物之動靜兮固窈焉而各在也溯孔波  
而窺虞源兮閱萬禩而未壞也曷闢而非翕兮氣必斂  
而後散彼春陽之渺漭兮疇不始於冰霰是用藏感於  
至寂兮若斂華而復根保未發之太和兮粲長氣之長  
存豈鶉居而鷇食兮固無懷之逸民息固有時而作兮

妙精義於入神自屋漏以達大庭兮市與井其交錯鍾  
鼓發而剗訇兮舞豔姬之瓔珞晃白刃之在前兮轟雷  
之破山方澄心於止水兮契先天之泊然富貴固不足  
淫兮恐茹藜之樂改相蠻貊之猶行兮胡衆疑之可詒  
朝兢兢而夕惕兮恒內顧而反聽奉至德以周旋兮踵  
如愚之服膺雖盤水之可奉兮忽覆滿而變盈矧師保  
之弗臨兮不輟步於窈冥質既不逮於松柏兮期後彫  
於歲晏金可渝而石泐兮莫堅貞之銷與善何遴而可

持分道何取而可遵玩括囊之無害分首致慮於出身  
黜枝游之穢辭分發安定於儼若跡考父之循牆分戒  
子輿之履薄苟由中以潤身分絜諸家以度邦寧履繩  
而蹈獲分敢要駕而猖狂繫神聖之至醇分始聲律而  
躬度徒一間之未達分尚計仁於月數況末路之崎嶇  
分實華溷而多違貌修仁而色取義分假伯車而不歸  
才一善之可稱分已蠅尊而鼯滿悵藻鑑之日非分但  
求士於婉孌視中國為帷房分競獻諛而貢妍何祝鮑

之紛沓兮有江亢之靚曼聖既不可以一蹴兮世波頽  
而風靡非確乎以自任兮寧不亂於毀譽昔夷齊之耿  
介兮違一世而不顧抑士師之直道兮亦三黜而不去  
寧蹈火而赴焦兮忍委隨以干榮甘枯槁而赴淵兮羞  
骯髒之成名豈不行忌夫太潔兮固余懷之所憚總璧  
碎而珠沈兮肯同光乎瓦礫人固有過不遇兮道豈因  
而窪隆蘭在谷而自芳兮脩竹寒而鬱蓂莢與華其代  
謝兮鳥翩翩其溯風祝喧啾之並舉兮有戛戛之孤鴻

或屠羊而處穢兮或傭身於五穀歌白石於牛衣兮抱  
汲甕於蔬圃咸和光而忍詬兮志與業其不頗吾惟求  
堯舜而不可見兮又安能恤其他息吾駕於疎樾兮解  
吾佩於南沼散寶璐而弛明月兮何杜衡於芳草縱鸞  
鳳而逸騏驎兮非青鳥以為媒颯遠颺之冷冷兮偕上  
帝而往來聖與賢其轂擊兮遇文王於靈囿曰敬止之  
一言兮可終身以為守苟跬步之失中兮風雨作而晝  
冥體且解而弗集兮又何達於神明舟中流而失枕兮

車半途而解轍雖獲禽之如陵兮固智者之所惑況僥  
倖於行險兮競角勝於魚龍恐獨寢之愧衾兮能不失  
色於旌弓仰青天而不懣兮俯清泉而不忤豈求靜而  
遇安兮自拙居而逢樂衆告予以大寔兮胡不轢天衢  
而翱翔無亦有是心兮材乃後乎飛黃彼周公之赤舄  
兮后夔進而笙簧豈云勝夫一簞兮亦惟天命之所將  
孰不欲體全而用廣兮古與今之可指聖人吾不得而  
見兮庶幾見夫君子吾欲究精微而極之兮畏言繁而



道微託四德之嘉名兮慎幹事之樞機

抱膝賦

有序

明 沈朝煥

余也郎潛有日抱疴經時蒲柳彫殘笑形骸之假攝涼  
暄代謝感流光之易道虛往實歸保恬亡智還真一域  
釋超萬緣馮生之顯志名篇未窺靈象張子之思玄有  
作徒飾曼詞聊托高眠爰申短賦匪以揆藻揚葩是用  
導達氣意云爾

滲玄液於麗形兮賅骸竅其異造節循虛而林樂兮緘

玄黃而若肖肆馮澤而負衍兮宅靈機之微兆中幅憶  
以樞譎兮終涂憚而疑掉聿蒸菌之靡常兮紛躍冶而  
授儀既執象以跼制亦曳聲而發羈乍排滿而負重或  
捐瘠而離奇夷羣脰於肩肩霍衆眎於眊眊嘈肆懷於  
勞標分害縵而若微兀螭螻於卑寢眇娟嫫而脂腴糅  
千形以鼓鑄錯萬狀而殞虛幹流遷以消息乃窮宙而  
靡夷伊肇古先厥初分類乃牙乃角牛首鳥喙蒙俱僂  
儼呱啜棄妹勤子屠母形枯質儺僮儻若龐累累奔潰

長人巨狄焦僥侏儒何盈何縮厥狀是區叔山惡駭條  
侯讖享羊舌豺聲豎牛戾膚門黔邑哲仁暴殊趨豐下  
亢宗相祥當衢王駘介介子祀拘拘夫安知蹢閤之非  
全支離之為庾其皆冶化於陰陽之炭而青黃於溝斷  
之餘彼童而昏亦壯以頑縵牽是係柴柵是攔輿髡首  
以怫悵庖羸行而嫠嫠俠烈兮買首而畢志忠信兮自  
屠而納肝信忌鵬以憚犧越棄意而慕羶互韞掇於滿  
心怡撞杌於世顏既崩騰以排拶亦蹢躅而標褊介拶

畫其疑蛻垂缶踵而不顛任啄抱於卵殼乘渺烏以逞  
還孰索之形骸之外而曠心廣莫之間爰有至人憬爾  
噩悟貼焦原其量趾遠宮隣而凝步首廉麗以薄榮濯  
靈奇而含嫫悼湛河而失航矯瞥天其鍛羽難玉寥而  
璞沈舒滌躍其疇遇維單豹其互斲兮逃裏襮而靡寧  
訛牛哀與鼈令兮紛變化而不經徒覆醢於婞直兮亦  
叵形於質誠曾史煦俞於操藥兮斃顏冉於中齏之程  
迺睇冥紀之絃覆兮晚發機而默折即臚情而端策兮

亦恍惚其若缺耶致命以遂志兮體閒愒而覃詰組仁

義於藻繅兮佩貞亮於珩璜暴潔修於熹光兮沁幽圖  
於汎冽聿信姱以練要兮每執清於內熱蹇予昌翔於  
世詒兮中當途之驕穉橫汨謀以矯誣兮負喻訛之遺  
累回寒離而玦環兮凜倏收其猶棄憑嘉睇以舒此丹  
慊兮怫然觸象虎而心悸比判妻於逃翟兮求唐子而  
跋扈疲玄戟於隕危兮華唐巔於陪侍金馬漫漶以濯  
落兮名位偶以其隆替幸秩微於解僞兮舞居諸而隙

視於焉覲自厲以修絜兮獨慷慨而雇反悲青春之靡  
遷兮遲白日之婉婉曠遇巷之尚塞兮洵納約之孤蹇  
喜介疾於商兌兮決羸藩其未遠恐雖斂而臭載兮鰥  
厥君而即於汎瀾之坂吾不能登櫟而椽蠹兮故蠲征  
於此路憾大雅之淪亡兮從三立之所慕聊枕藉於簡  
編兮餐沆瀣於竹素罄澄心於儒林曠流覽於武庫顓  
揚班之駁霞鷗淵雲之澍雨眇作者之為曹兮姱代彫  
而肆潔萼蘭芳之歲穠兮噴長瀾以獨絕虛玄與俶詭

而森奪兮庸捷獵於操末躔緯度於正始之壺奧兮撫  
華實於建安之封埒寵雅豔於意匠兮涼非薰白其焉  
掇傲睨百代以引睇兮營魂神化以厚竊變丹青於玉  
瑩兮猶鬱鬱以憇巧而自閉夫亦知彫蟲之渺伎兮匪  
衆妙之所尊遂蠹沒以愍生兮托峻詭以孤存重襲卷  
鉅而不可章兮思麾蚤而匿質庠休樊天垂貳而地騰  
氤兮羌廓落而抱乎玄牝之根洞靈威於鼎嬉兮養五  
德於愚芑就碩人以折中兮還吾反乎故宇神介山之

伯子兮異傳巖之築父啖首陽之靈糧兮躡鬼谷之舊

武求善卷之所淹兮遇許由於負黍款子高於中野兮

得伯成而駢伍赴清冷而藏枯兮締邁軸於阿廬意條

昶以愴愴兮俟回風而容與乘高駝而馭彼閭虛兮指

五嶽而遨遊來三花於二室兮踞啟石而虛求貫龐鴻

於天中兮撫垓埏而四周匪乞靈於降神兮通元漠於

鎮丘蹙巨靈使西傾兮擘雙掌之森張珣明星而佩璣

兮竄神女之瓊漿博天帝於三峯兮歷欽崙而削成乎



四方餐白氣於金天兮採芙蓉而嗽芳驂背指於恒嶽  
兮瞰炎水之潛育偃連繚雲雷於率然兮禱玄光於燕  
玉繳彼鵠咬於幽谷兮揖昌容而洞闡庠北陸循路曠  
以徑通兮覽蓬萊之舊山頽日觀於岱宗兮拾玉泥金  
簡於瑤草之間聽稷丘之青琴兮鑿石釜而解顏羨南  
榮而調饑兮指石困而溉之列潛霍於前豆兮沐月館  
而蜺蛇血白馬而轡彼玄夷兮羽二妃而參差序湘湄  
騎驛驪而稅止兮吞雲夢者八九而邈不知其所如於

是含煙煨割玄契霍祓氛鏟機彗抨巫咸僣屏翳耒瑤  
蕊軒瓊劑月妃姬雲師嬖岐伯尚方祝融擁篲靈媧按  
節伯僑傍晚忪惺惚以讓恆曼流爛以淫裔踴躍而狂  
趙以章亥趙伋而叫踏乎昇洞出鬼晷雄躍天門睽  
暘日月攢捻乾坤招搖太一捫捩崑崙括囊元氣闔闢  
帝閤叩厲列缺舒節北垠箕輝夕斂跋羽朝髡長離拂  
尾素威奮蹲玄冥閔閔黔雷虺喧展融洩於太始而總  
洪縻於渾元爾乃統攝遐心還反玄對修初服之婆娑

守常閭之昧晦蓋約節而守神羌進道而忘技襲貞良  
之潔白以為范兮製雅頌而為佩仍繫縈而督引兮亦  
過化而遞代無留車而崖返兮慙滌壑之未逮樂權輿  
於自然兮味至德之盛晬互排虛而踰實兮不窺牖而  
覽造化之常態考則上皇逍遙中林據不死之床撫無  
絃之琴兀然抱膝曠爾長吟吟曰俯仰天地常睢盱人  
生若浮朝露晞兀若土木含天機身無羽翼吝不飛遽  
生卷懷在知非老氏谿谷耽玄微河清難俟兮天不可

梯行道倭遲今中心有違超絕曠蕩劫來歸匪抱初地  
疇焉依

酬德賦有序

明 盧 柟

昔謝宣城作酬德賦以報沈侯柟自庚子歲被誣繫獄  
十年餘自分朽骸永絕人世趙王殿下憫然鋟柟四賦  
灑以睿藻用雪梧臺之寃壬子冬柟既以上命平反迺  
如趙朝謝王哀其窮錫之珍饌肉藥寵隆渙翰天日疊  
耀方之宣城所感為德何如然神以理超情以文遣匪

辭之麗斯焉取酬於是因謝名篇聊著鄙賦曰

爾迺歲既暮時將竭寒蟬鳴流芳歇搖落洲渚沈寥立  
樊千里直視黯然銷魂情感鷗鷄愁淒淒斷猿悵氛濁之  
褊狹馳清想於天埏慨夸父之鄧林弔燭龍於崑崙緹  
余焉兮扶桑枝涉余驄兮桂水湍拾江妃之明璫跨湘  
靈之翠鑾於是巖巘互起江河橫變封豕卧啼雄虺坐  
眇風露傷足晨風瘁骸汨海濟以傾楫欬凌風而鍛翰  
豈蒼蠅之點玉實萋菲之交煽囚園土兮曳長纓俛冤

頸兮泣吞聲仰飛鳥兮今不可攀思日月兮何時明嘉虞  
卿之撰籍希黃霸之授經簡一閱而三歎魂竟夕以九  
升志沈緬以鬱陶氣於邑而填膺揮思彤管裂衷竹素  
秋澀就章風謚託賦信陰陽之迭運肆虧盈之無愆將  
長號於帝閭賴造始於英藩偉神聖之授彩播天人之  
名篇泚瀝液以淫灑紛藻潤而芳妍振金碧之琳琅照  
丹腹之瑋爛羌雲涌以霞駁倏龍變而鳥騫皎若凌天  
河窺織女雲漢之章鏘若升清廟聆師涓洞瑟之絃齊

末伎於何李藉隆譽於謝田翼二京之可紹埒三都之  
並翹警司命之炯旨款士師之酸言爾迺聲流臣工華  
照八表市虎解讒亭姬雪慄返景崦嵫合劒龍沼起灰  
骷兮發夜臺披雲霧兮天門開攬衣帶兮非疇昔聊躑  
躑兮心魂哀於是緩貳負之屠械啟華表之靈思雖城  
郭其如故已人民之半非陟北堂以徬徨痛考妣之先  
違二稚逝以如往一女殞而方歸彼蓬婦之苟活亦老  
醜而堪悲涉園亭以凝眺見蒹葭之蒼蒼橋偃蹇以斷

石壁陟池而橫窗雲幽咽於翠岫葉蕭瑟於銀牀瑤草  
萎兮菸壑桂枝彫兮垂牆望佳人兮不還歲將杪兮怨  
長於是季冬嚴寒北風騷屑江雲結凍海煙飛雪蒼隼  
凌飈代馬警節邁世懷賢銜恩赴國仰攀嶠屹俯涉清  
冽揭閭闔以延佇導玉階而屏營壁連錢以銜釭牖疏  
鏤而鎖青爛昭華於東序裊翠葆於西清擬承明之彤  
廬或鈞天之帝庭回蚪顏之萃渥冠日表之奇熒侍螭  
頭以陳辭撫龍翼而若驚爾迺玉音綸發神袞燦亮天



風四敷春陽疊暢八珍馨流三鶚芬颺駝羹已霑鳳炙  
再貺醴酒陳兮汎翠瀾醉起舞兮嬌朱顏願君王兮惠  
一見壽千秋兮歌瑤壇精髣髴其如思情悵鬱而弗安  
步徙倚以舛陞涕淋浪而流泉將振翮以遐舉忽掩臆  
而長歎元雲鬱以凝盼悲風颯而無端昔園門之多險  
嬰金鐵之拘繫效魑魅之微軀望豺虎之一餐敢謬想  
於煙闕覽清輝於鳳鸞德裕命而匪測恩潤身於無埏  
幸濡翰於藝圃銜一羽而塞乎巨川迺為之謠曰若有

人兮滄海涓汲光景兮馭雲螭時蹇產兮隳淵涯宛將  
逝兮長離思大人造兮參南離恢冤網兮超塗泥惠芳  
腴兮恩不訾誠既感兮我心悲揄丹悃兮歷賦詩彌億  
萬兮英聲垂

懷恨賦

晉  
潘尼

伊疇昔之懷憤思天飛以遠迹望循塗而投軌溯朔風  
以理翮冀雲霧之可憑希天路之開闢何時願之多違  
奄就羈以服役因吳坂之峻岨畏鹽車之嚴策嗟遊處

之弗遇奚鬱悒之難任背宇宙之寥廓羅網罟之重深  
當屏氣以斂迹焉遊豫以娛心傳釋板以亮殷望投竿  
而相姬窮獨善以全質達兼利以濟時聃安志於柱史  
由抗迹於蒿箕理殊塗而同歸雖百慮其何思敢因虛  
以託談遂逡巡而造辭

閔水賦

明  
童承叙

王沙公子收吟發興戒御勅騶周遊乎竟陵之陸長眺  
乎江漢之流裴回大堤之旁躊躇故城之上物蹇產而

彫零景蕭森而板蕩精惝恍以慘惻心忉忉而怔悵還  
過三蒞道見漢津父老而問曰何謂其然也父老撫膺  
而長喟攬涕而前陳曰痛乎公子之問人命避巧於構  
室靈胥躍怒於潮波陽侯效力於水窟支祈競怒於洪  
河誠皇天之降匪斯人所能和也公子悵然有問曰嗟  
乎詩咏靡遺之災書紀阻饑之阨今時則然矣若夫民  
之罹病也顛顚之狀得無異乎父老曰殷雷震威蛩蛩  
構虐雲滄風迅電激雨作鬱氣滃浮繁湮濡滋林樹霧

迷寰宇晝失靈黷氣氲舉澌崩渚遺沱砒矻沈沙漱石  
韜三光潛列曜溢天潢瀉丹壑浸淫彫瘵之心沉淪頽  
頽之身烟寂寥而絕炊室垂罄以無營愁鷄鳴於如晦  
嗟羝羊之晝行爾其濛濛連瀼感沸滂沛既彌月以逾  
旬衆沴瘁而訐潰物胥莽而靡孑路於寧而罕通遂藉  
疾而嬛疚爰抱癭而長終公子曰若是乎其甚乎父老  
曰風姨肆酷噓撼乾維吸收坤軸江洶海湧谷轉山頽  
浪翻波詭岸裂雲迴水怪碣砥河伯崔嵬礧若地坼豁

若天開龍飛揚以瞋目蛟騰驤而飛沫鯉一角而噴浪

鴈九首而滑礪匡隙為之泐嶢區夏為之昏濁居飄颻

於驚飈舟推折於深湍或挈妻以蹈溺或抱子以赴沈

或委體於盤渦或托骨於瀉潯偃仰兮混淪之府躑躅

兮魚龍之區或載浮而載沈羌孰諗其止居公子曰若

是乎其甚乎父老曰歲暮時昏風起雲沈掩霞翳日積

晦累陰霰兮淅瀝雪兮紛緇密兮若絕疎兮若連穿細

微透乘危暗摧掇之指裂親之體虧如圭斯方如璧斯

圓如縞斯白如玉斯寒斯時也火井滅溫泉冰炎風勁  
陽谷凝起瑤城於粉野攢瓊枝於玉樹天地閉而嚴肅  
蘊隆結而寒沍於是蔽縑之夫枵腹之民感發刺其骨  
栗烈鑕其形乃徬徨而殭仆偃蹇而惇荒暴枯骨於交  
逵橫遺骼於蕪城使肉飽乎饑烏臭避乎過客蓋終古  
之青億類之極恍也公子酸顰而捧心歔歔而改容重  
進父老而告之曰詩曰哀恫中國具贅卒荒靡有膂力  
以念穹蒼斯是之謂歟雖然今聖明昭燭德意懇惻遴

選臺司賑出帑積加以使命者率甘棠之政司牧者盡  
召杜之德父老其將被如天之仁蒙掩骨之澤升父母  
之堂就衽席之側當不淪沒於陷阱展轉於溝洫也迺  
為鴻雁之歌以廣之曰鴻雁歸來兮河之側河之漣淪  
兮菰蒲其實可飲可食兮去將焉極鴻雁來歸兮河之  
央河之清泠兮蒹葭蒼蒼可棲可宿兮去將焉翔鴻雁  
歸來兮河之濱沙波淨渟兮畢羅不驚返爾高翮兮其  
究安寧歌竟父老再拜加額受命踴躍而去公子迺罷



御叱徒僂步永歎歸疏所聞危坐待旦

懷思

幽思賦

有序

明

顧起元

歲壬癸間顧子屬有所感徘徊黯然援筆賦之則有繩  
之者曰古之賦也勸百而諷一若無乃為歸美握椒者  
噉矢乎且夫香纓靡曼何必文府哉顧子曰唯唯否否  
理有衡之而塞情有抑之而揚是以濮上桑間太史不  
廢巫姬湘女騷客志思意有攸衷非以淫示也客敬罔

而退

夫何一佳人兮步翩翹以自娛修顏抑其若揚兮紛玉藻而璫芩娘初揚之旖旎兮美薜華之閒都榆東海之阿錫兮佩瑤璐而紹明珠薄資萊其不御兮滋蒞蘭於綺疏走鬯堂以曄盼兮志舉蹇而跼蹐玄髮澤而可以鑒兮曼睩流波之欲瀾絙瑤瑟而不忍彈兮願抽憑而永歎羞鷺羽之差池兮感女牀之文鸞闕西隣之嫺麗兮影欲就而復安鳩告余以自媒兮心猶惡其諛諂而

佻巧蹇予而四顧兮望瑤池之青鳥指明星以為期

兮托微波而通辭蘭氣吐而若凝兮芳容澹而若思五

音紛高堂而繁會兮羌獨目成而心與雨霏霏其步檐

兮雲容容而承宇垂翠幃與曲瓊兮藝迷迭與都梁演

天老之素儀兮陳祕戲於軒皇乍霍靡若扶渠之汜淥

波兮又髣髴乎明月之逸夜光意嬾嬾而不自持兮思

婉瘳而恐其不得當懼緯繡之數化兮要大神為余昭

之闔浮雲之驟合兮忽流飈而問之惟宴娛之曠瞬兮

怨涕徂之須臾何雙鵠之担橋兮獨塊鞠此鷓鴣回風  
既咲盼而搖茹蕙兮明月又露暄而歆碧梧朱絃慘而  
不揚兮遺玄醴之湛玉壺不心知其亦已兮孰別離之  
可忍氣消灑其若波兮心緊綦其若勒苑余懷之邑邑  
兮霑余淚之浪浪車踈蹢而不前兮馬蹢躅而不行余  
既樹筵簞與崑路兮佇俟時乎吾將采惟曜靈之西暉  
兮懼朱顏之易改雁南翔而嚙嚙兮鷺北迎而翩翩固  
知余情其信婢以練要兮願及君之盛年閑房櫳之青

苔兮私掩涕而御蕙纓何黃姑之與織女兮耿銀漢而  
相望擷秋菊之鬪英兮畏滿園之白露獨申旦其不寐  
兮魂營營而至曙系曰我所思兮在鍾山欲往從兮江  
水潺美人贈我兮玉如意何以報兮合驩被浮雲駛兮  
西北馳春草萋萋兮王孫歸

永慕堂賦

有序

明  
顧起元

永慕堂者吾師京兆少尹毅軒周公慕其太翁太夫人  
而作也夫五十而慕大聖猶難公立朝三十餘載今且

儼然華顛矣而孺慕不衰於少古之人乎何以踰也小  
子元夙佩仁風誦蓼莪之篇舊矣敢泚筆以賦之其詞  
曰

繫維斗之孕靈兮闡坤珍於雲陽仍佳氣於黃山兮芙  
蓉矗而瀨霞張徽水建瓴而渠淑兮倒屈注於天潢茲  
山之鬱鬱兮扶綠字於黃囊總柏栢采蚪於明月兮碧  
楸鳴鴉鳴於凜霜封馬鬣而隱金椎兮負若斧而馮若  
坊檄嶧領之華表兮豐夷峻之朱堂儻歸雲於藻井兮

枕騰日於茄梁薜荔繽紛而網戶兮申椒酷醜以被唐  
畹滋蘭而畎樹蕙兮搖風振而遞芳唯大夫之顧瞻兮  
中涓濡其若探湯神惝恍而孔填兮步夷猶而方皇懷  
二人於明發兮詠飛隼之載揚昔汝南之樹德兮祛蕩  
風於斯邦俛仰而蔭彼數人兮譬寶劔之干將學王廙  
而遠引兮披二酉而銍三蒼愕風隨而雲走兮鳴枯管  
之琅琅冠切雲之崔嵬兮葺芰荷以為裳疏玉除而緝  
桂檠兮紛旖旎乎都房喈鳳卜之雖雛兮叶絲體之將

將惟清心而玉映兮嗣彤管於孟光靡抱冲而弗盈兮  
疇惇固而勿昌產龍媒於渥洼兮麗鳳羽於岐陽排玉  
門而世閭闔兮覽阿閣而迴翔職柱後之惠文兮補袞  
闕於未央眎金鑪與玉鉉兮握蘭蕊而含香回適子  
而披昌兮形蹙跂於神羊躬廁牖而紆綵兮忽乘雲乎  
帝鄉左招搖而右豐隆兮鞭列缺而輾雲將啖寶婺之  
挺暉兮趾曜靈而繼藏孔蓋翠旂之翩翩兮挹婉衿與  
東王青鳥集於飄飈兮鵠鵠啼於空梁河予涕之潸潸



兮海予淚之浪浪帝閭狃狃在鬱蕭兮孰召歲崇與巫  
陽載陳詞於飛離兮爰告哀於上皇繩玉簡與金泥兮  
挾天藻於黃腸欸合璧之不停兮痛音徽之莫彰神髣  
髴於總幃兮燈的歷於金釭眠南雲而綰歎兮步列星  
而極明銜終邱於旻天兮孰俾予之可忘帝求直於簪  
劍兮騁驄馬於康莊厲排風於鵬鶚兮寔當道之豺狼  
播箕澤惟豐苞兮陋銛筭之趙張視門左之桑弧兮丈  
夫生而志四方練予情其信糾以天紹兮唯蓼莪之盡

傷咏白華於周雅兮奠桂醑而御椒漿陳羅薦授彼玉

案兮峙粃粩與饔飩闔華顛之肩肩兮純孝思之有常

彼艾首而遐慕兮於姚氏之煌煌踵徽音於旅樹兮耦

龐德於鳩郎盱茲堂之兀聿兮天辟址於陵岡下竹苞

而上松茂兮配二儀而久長亂曰天性罔濫人靈植兮

六鑿既攘彛德斁兮鮮民之生靡銜卹兮有美人兮純

孝一兮含德之厚心如結兮高堂莪莪音靡逝兮鬱陶

思親載營魄兮孝橫四海六幽塞兮援神司契世乃奕

兮子孫振振螽斯揖兮濬哲維祥考斯室兮於萬斯年  
永無極兮

懷君子賦

元  
楊襄

繁岑樓之翼翼兮倚層城之隩隈敞八窗以軒豁兮仰  
飛甍之崔嵬西雲山之矗矗兮喧江聲之若雷肆瑤席  
以鄭重兮呈琅玕與環瑰誕延賓之翠館兮倚吹簫之  
鳳臺褰羅幃之芙蓉兮盼美人而和諧羌素懷而耿耿  
兮望青鸞之不來謹修容以遙睇兮隔雲軿乎徂徠宛

清夢之繾綣兮忽中宵以驚猜步廣庭以夷猶兮瞻牛  
女而徘徊援猗蘭以寫抱兮拂素琴之凝灰希盛年以  
綢繆兮何參辰之或乖憶黃鳥之嚶嚶兮感賓鴻之獨  
哀炯予心之如璧兮悵遠道而悠哉已矣乎燕議詘兮  
訓狐是咤荃蕙疎兮蔓草盈階曷歸去兮翦故山之萊  
望玉京兮閭闔漫浮雲兮不開整羅襪以行于沾白露  
兮蒼苔仰碧虛之明月庶流影於君懷

別知賦

明  
趙時春

平涼趙時春既放逐於涇水之陽笄頭之麓友魚鳥而  
伍麋鹿南山戚子秀夫釋輜輶而訪焉曰吾聞聖人不  
役役於時而蟬蛻於物上故實之而冰消爍之而春盎  
河淮橫流巨靈天吳鼎鑿吞雲而砥柱呂梁之碣不移  
也吾子奈何解朱絃以紐犁埋韶濩之清賞伏龍光於  
重淵溷淤泥而長往負鹽車而垂耳忘萬里之雄想曷  
以翹首奮翼嘯青雲而欲上騰驤於九達之衢俟軒蓋  
之高敞苟黃虞之有作猶庶幾於方響使汰廓而靡倡

竟闕寂而孰與為黨乎時春曰唯唯夫子所言乃見田  
躍淵之志蓋未覩於盤鶴潛蚪之事也蚤負禪而振股  
視九華瑤池之境猶鉅厠也異哉軒轅氏之間彼髣髴  
焉知其具茨乎田有粃粃無羨福荔釋躋息蔭以誇連  
騎操椎攻堅不藉鋒穎之利故聖人喟然於浴沂而擊  
節於顏氏興漆雕之深說數有望於由賜故曰達人安  
命君子不二仁者見之謂之仁智者見之謂之智百姓  
日用而不知庶幾乎羲皇之治戚子嗎然而笑稱詩曰

振清風兮被皓月南山翠律兮涇流焉歇執策授綏載脂而別

望遠賦

明

石 瑤

懷滄沱之美人兮睇恒山之長麓歷高岡之千仞兮騁青雲之華轡西望封龍東瞻信都凌霄振衣溯風縱呼氣橫九垓天開五湖羌欲去而遑迴兮晚荒墩之碧蕪乃有却秦故城盟齊舊址禾黍西風蕪蕪漢水逢去燕之望諸兮得田叔之梓里問前路於征夫兮訊山林之

野史訪棄瓢之老父兮求擊筑之巨豪贈昆山之玄瑛

兮解明月之佩刀發劉琨之清嘯兮等萬事於鴻毛山

欲暄兮雲萋萋谷無人兮烏嘈嘈瞰梧桂之氤氲兮想

雙鳳之鳴翔盼芻兒之躑躅兮感雍門之悲謳果孟嘗

之不來兮亦平原之罔留繫陵谷之變遷兮曾幾人之

駐輶忽兩曜之徂邁兮挾八風而周流於是九州縱瞻

萬里入視山河縵迴百獸崛起叫衡陽之歸雁兮送天

池之鵬徙要海上之安期兮論羲農之曩軌采瑤草而



漫吟今據高梧而假寐倏心曠而神逸殆不假於熊經  
而烏跂吾不知世之忘人人之忘世也乃絕洪源復睹  
秦人桑麻蔭翳俎豆龐敦歌流擊壤禮謹汙尊餐朝霞  
之既多掇秋露之實繁拉芳鄰而共集傾高蓋而定言  
夏后夔之鳴球撼千尺之雲根藹流沙之捧捧忽瀾漫  
乎崑崙瀚海北注大江東奔碣石差峩巨嶽雄蹲蓬萊  
方丈不可以跬越今儼眉睫之且存予乃發昆吾相鄧  
林斂遠翮披雄襟岱華礪錡洞庭淬鐔起萬窟之蛟鼉

兮俾歌且舞以助吾之長吟

思歸賦

宋

梅堯臣

祿有可慕祿有可去何則移孝為忠曾無內顧則祿可  
慕而可據上有慈顏以喜以懼故祿可去而不可寓噫  
吾父八十母髮亦素尚爾為吏負馬遐路嗷嗷晨烏其  
子反哺我豈不如鬱其誰訴惟秋之氣至慄慄而感人  
日生愁思側睇江濱憶為童子當此凜辰百果始就迭  
進其珍時則有紫菱長腰紅芡圓實牛心綠蒂之柿獨

苞黃膚之栗青芋連區烏桺五出鴨脚受彩乎微核木  
瓜鏤丹而成質素乳之梨蘗壺之橘蜂蟬淹醯榼楮漬  
蜜膳羞則有鵠鵲野雁澤鳬鳴鶉清江之膏蠓寒水之  
鮮鱗冒以紫薑雜以菱首觴浮茱菊俎薦菁韭坐溪上  
之松篁掃門前之桐柳僕侍不譁圖書在右或靜默以  
終日或歡言以對友信吾親之所樂安問里其茲久切  
切余懷欲辭印綬固非效淵明之褊衷恥折腰於五斗  
蓋自成人以及今未嘗一日侍傍而稱壽豈得不決去

於此時將恐貽恨於厥後

御定歷代賦彙補遺卷十八

謹案第一頁後四行闡炎漢之由儀刊本儀訛巖  
據元文類改

第一頁後六行謂貞信之在茲刊本貞訛其據元  
文類改

第二頁前一行翼時彥以驂駢刊本彥訛意據元  
文類改

第三頁前二行宵營營而無寐兮刊本宵訛雷據  
元文類改

第四頁前一行緣微經以扳援兮刊本扳訛援據

元文類改

第五頁前四行凜蒹葭之露露刊本蒹訛鰲據元

文類改

第十三頁後六行羅襪躡蹠而逡巡刊本蹠訛蝶

今改

第二十三頁前四行脂余牽于吳甸兮刊本牽訛


牽據詩經改

第五十一頁前一行執策授綏刊本授訛援據禮

記改







總校官庶吉士臣張能照

校對官庶吉士臣章宗瀛

膳錄監生臣沈璫

欽定四庫全書薈要

集部

御定歷代賦彙補遺卷十九

詳校官候補通政司經歷臣郭祚熾



欽定四庫全書薈要卷一萬七千四百

集部

御定歷代賦彙補遺卷十九

行旅

北客賦

有序

宋趙奭之

北客宦游巴楚歷三峽之險而抵永安故區地勢近瘴

兩見盛夏官居民廬皆在山麓鑿地數百尺而不及泉  
故市無井里無醫客患之而勉同市人飲諸灤水苦瘁  
穢引之澗谷而懼虺毒俄有老叟謂客曰漕府廉臺有

二井焉泉冽而甘盍徃汲之客曰使者之庭闈人嚴守而應接有時甚非羈旅所敢妄干叟莞然而笑曰子胡不采之風謠質之行事善利濟衆初不禁也客於是拜其言感其意而徃汲焉迄今逾年暑無瘴暘之苦而得以安居是使者之惠也輒賦其事而抒素云其辭曰

北客伶俜陟彼崔嵬南游巴楚實仕於夔歷白帝之區域賊赤甲之嶮巖瞰濫潁之出沒峙瞿唐之巍巍觀楚國之絕塞悼蜀宮之故基客喟然歎曰昔窮兵百戰用

武之地也仰而無覩但見林莽翳鬱岵岵峒峒巖巖雲獠  
烟靄對一色三時豫和炎夏為厄逢辰久安用夏變貊  
歲褰連郭龍勢蛇跡官府民廬棧阜構麓八家無井而  
不能草客患之而同市人臨灤津雜滓穢汲黃大齋渙  
忍之流泪人精神乃訪屢屨之下臨嶙峋之曲千人挈  
壺百穴漱玉清清泠泠而冰敷雪沃未幾有叟呼於列  
曰子曾不知不毛之瀘自此塗出葶藶叢滋虺蝮潛匿  
炎毒之厲而是生百疾溪流可酌而中有沙虱蝨實大梁

之公子胡不自衛而反蹈其失客謀於叟為之奈何貧  
如顏回而有飲瓢之樂曠如孺子而有濯纓之歌叟豈  
能既我以甘露濡其旱禾叟於是逡巡若避赧然變色  
僕游塵世安有神術知夫西有漕府東有廉臺方布天  
子之仁澤救民之旱災烏能秘一縞之清潔坐視遊子  
之炎埃客釋然解疑僕僕駿馳中涓歛衽下氣以道使  
者之德音自云汲之引之周浹旁及而閭無夜閉雖負  
年以逝濯類抱甕而為隧請觀夫易卦曰井養不窮兮

收而勿幕又稽之老氏曰幾於道兮善利萬物散為四海之惠不止匹夫之恤噫鼯鼠飲河而不過滿腹鷦鷯巢林而不過一枝苟足各有其極雖多亦奚以為故蘭臺之風不及於甕牖而楚子作賦西江之水罔濟於轍鮒而波臣見譏客於是慨然感慨頽然下拜明既能哲佩以為戒信乎君子之淡以成久而不壞

南遊賦

明 田汝成

歲次閏茂月旅夷則歷日戊寅七夕令節田子將祗役

桂林貌焉異域戒行李辭嚴君展瑩宅謝姪姻供帳南  
浦弭檝西津迺喟然歎曰迢迢畏途險矣隘矣佻佻征  
夫厘矣僊矣夫運有窮通事有順逆安土敦仁謂之迪  
吉故度德量能中外以秩者君之制也委身陳力夷隘  
無擇者臣之義也猥經術之寡昧兮濫策名於盛時效  
涓埃於一紀兮俶沿牒而登資王程檄其孔棘兮誼不  
可乎稍留遂揚舲以邁往兮訊南紀而遠遊關庭聞之  
定省兮眷桑梓之綢繆雖慰親以強笑哀憑心其曷瘳



路尸糞而負米曾受杖於耜瓜尊叱馭以馳阪嶠絕裾  
而忘家伊數賢之異趣兮予唯三復乎白華景孔門之  
崇孝兮何百行之能加陟五雲以騁望兮散余心之鬱  
伊禹穴蔚其對涖兮微河洛而永思輯瑞帛以會計兮  
防風後而蒙誅孔斥怪而不語兮胡辨骨之專車俄瑤  
山之岑嶺兮突秋江之怒濤乍翱翔以徐進終踟蹰以  
彌高束赭峽而訇磔薄赤亭以消搖陵廣斥而雲布迫  
枝汜而熊咆來不知其所吐兮去莫測其所韜將堪輿

之噫吸兮疇胥怒之能招降層岑而即舸兮御魚浦之  
緒風淹定山以回眺兮盼鳳嶺於冥濛旦予發於浙汭  
夕倚櫂於桐廬料文漣以淪茗毫翠荇以為茹山川鬱  
其盤飢兮信玄聖之儲胥攬予纓之纚纚兮濯嚴光之  
靈瀨晤入幕而輸忱曾不屈其鯁槩體肥遯以居貞處  
久約而能泰希巢許之遐踪何狂奴之故態指天末以  
西邁兮歷姑蔑之榛墟丁吳越之龍鬬兮悉率賦而從  
之踐茹膽以勗志媼持葛以作絲藉蠡種之夾輔竟澡

恥於會稽何六千之膚敏復假虹於妖姬貴乎聖賢之  
持滿兮履薄冰以自持彼何怙而淫佚兮少康祀其忽  
諸悵覽古猶未厭兮增羈懷之永歎泝行飈以催發兮  
紛不假乎盤桓釋余橈於澌許摠余轡於常山路威夷  
兮木杪風飄蕭兮雲端感新秋之策策悲故國之漫漫  
望玉斗之嵯峩峩峯驚鉛溪之修渚雲冉冉以歸吳人棲棲  
而泊楚亂彭蠡之汪洋兮康郎歸其在睹哂偽漢之草  
竊兮規潢池以跋扈皇祖赫以龍飛兮矇不肯乎為所

鼓蛙怒於鯨波灰萬艦於一炬先扶搖於鷹搏後蒼皇  
以鼠沮屬四寓之承平兮杭一葦以安流汎翩翩兮賈  
客眾濺濺兮漁舟塞杜衡兮幽淑狎鳬雁兮中洲沐膏  
澤而詠勤苦兮喟太息以夷猶會長風以鵠舉聊戢翼  
於洪都肅南州之高士吊黃壚以束芻蕃秉釣而少通  
兮矯矯節於頽波既下榻以承閒兮胡不規之以中和  
處明夷而用晦兮知其無可奈也互標榜以危言兮亦  
吾黨之過也誦古牒其多愍兮予姑順途以徜徉披劍

池之荒壤睇牛斗之餘光金川洌以維緩玉筍駿以高  
驤慨神物之恍惚兮仙之跡復已渺茫握椒醕而叩螺  
阜兮謁忠節之祠宮嘉趙宋之多士兮每登庸乎茲邦  
文子衰然而首舉兮值宗社之顛傾慟赤縣之草莽扶  
黃屋於滄溟靈亦知天壤之不可支兮要養弘以為正  
竭余力始就繫兮濱九死而崢嶸誓成仁而取義兮佩  
聖訓之孔明復靈歌以激烈兮涕淫淫其緣纓犯皇恐  
余上注兮亦靈顛沛之所履水湍瀑以下瀨兮擊危礪

之齒齒類駢馬之騰波象潛牛之伏渚沫沸沸兮霑衣  
風泠泠兮送予將感靈而助予兮瞥予濟乎驚端予既  
不難於利涉兮履習坎而愈安晞庾嶺之偃蹇兮路回  
回以造天石側疊以霞駸木夭矯以蚪蟠憇中路而神  
掉俯浚谷以顛朴豁崇關以甜閒兮嚴不可乎徑度過  
重海以來庭納八蠻之寶賦輦犀象而甌珠翠兮歸上  
國而布濩嗟曲江之人傑兮煒相業於開元闢茲關以  
懷遠兮峻故里之藩垣衣冠儼其世紀兮覽遺編而增

歎賦白羽以寄諷兮窺細德之險微予之言既艱於納  
牖兮抱殷憂於長離板上帝以喪亂兮悔違弼其何追  
乘凌江而下溯兮接南海之洪波憶當年之浪跡兮冒  
赫羲以流槎涉朱垠之浩沔跋赤嶠之嵯峨疲精神於  
夙夜兮冀青衿之速化遵半途而削迹兮雖式穀其則  
那予亦知迂疎之為患兮耿憤世而嫉邪雖忤時以多  
口兮剖心腎其無他掠端州以左轉兮訊孝肅之遺黎  
却片石而弗橐兮孰貪泉之能溜潯江流離而東下兮

蹇予舟以薄磷梧山龍從以隗罪兮路陂陀而逾峻逆

灘水以上浮兮入大荒之脩垌山參差以繚繞兮冗不

知其所名峯刺天兮戟立灘渚石兮雷轟霧霽對以下

浥雲滂渤以長蒸猩猿哀以夜嘯虎豹羣而晝行劃綠

林以唐突兮孰有戎之敢櫻何茲川之塞阨兮餘百里

而無人心屏營兮逾劇途遄迴兮蓋屯禹胼胝以荒度

兮曠戎索而弗理降芊楚以肇封兮輓篳路以略啟王

制闕而未被兮詎文德之能救忍羈旅以伶俜兮惕二



親之遺體超陽朔而北詣今及桂林之崇墉控五嶺之  
上游今鎮百粵而為邦洞重圍以方軌今壯屏翰之軍  
容其中則朱門赫絕文薨鉤閩植戟鳴鐘皇宗是國次  
則街衢弦直閭閻蟬聯五方服賈列隊居廛扶輿毓秀  
紆冕比肩於前則連山峭崿界以重江灑清瀉濁環陰  
抱陽經涂枝術貫穿越裳扼要領而南下若建瓴於穹  
堂於後則培以衡嶽枕以堯阜綸絡荆潭盤宗篤厚九  
疑繽紛以布翼三湘迴帶以澄瀏於西則山奔水導分

湘別灘發源月竈莫測端倪引牂牁之洪派委下屬於  
番禺於東則兩江迤邐與海通波飛艘絡繹鬻販魚鱉  
泮散夷落北走湘湖巡四郊而容與兮庶斯域之可居  
鄉心愜其勃發兮哀眩曜其猶初佐旬宣以賦命兮媿  
實約而名虛駑駘駕而戀樞兮思抱影於空廬遠父母  
而弗穀兮陟岵岵而連如孰有翼之可假兮願一覲夫  
里閭魂展轉以達旦兮宦情索其日淡乞骸骨而返初  
服兮疏欲陳而未敢擇官而仕豈臣心兮顧私衷之寡

歡傾肝膽而孰諒兮叢謫詈予以避難第抑志以就列  
兮順時命而即安奉簡書以從事兮又怵瘼曠之為患  
亂曰大易有訓幼所懷兮消息盈虛與時偕兮困亨而  
貞反諸已兮永終知敝慎厥始兮死生富貴命在天兮  
釋躁寡怨維永年兮達人大觀眇四海兮雄飛雌伏安  
以待兮欣戚異感途所經兮歌以永言舒旅情兮忠信  
篤敬慎修身兮雖之夷狄終無尤兮

導南賦

有序

明  
梅鼎祚

歲壬申秋九月余征於南蓋予齡冠矣行所睹記多六

代遺蹟可弔而歌謠其泰者足用訓至相嬗而不還踵  
亦憖其多故焉周之鎬豐今在斯矣顧詹之暇稍韻其  
事什伍竊放昔人述行而賦導南如其鴻麗闊達以汴  
德頌勛則班揚張左之業非是賦本指余病未能賦曰  
余嬰世之弗豫兮瘁蒙昏而寡儔何緒采之委錯兮裒  
混濁而離憂洞中冥而延邊兮締詰符於遠遊寅厥蓋  
而疊疊兮紹協思於舊京戒僕夫以中夜兮肅嚴駕而

晨征惟咄親之臚疵而怫鬱兮步盈軒以自虞相婦處  
之多吝兮勔作氣於懸弧撰良辰而云猶兮遂躡蹻而  
南徂鼉祝輅於宛沚兮夕余濟於迺城遵大逵而旋顧  
兮望黃池之潏淫彼衆潤其攸同兮象景霽而謚清時  
秋氣篤於萑葦兮款緒風於素林路曼曼而超邁兮旌  
搖搖而曲張躋青岑以登頓兮存謝史之遺宮徑迴繇  
而窅阻兮宿莽翳而弗陽委千秋於玄夜兮寄淫思於  
予鄉騎跼跼而更御兮從徽徽而在後軫轉其道兮問

腴功於東晦，郁大浸洋溢而羣飛。今宿腓草於畝首，固  
天菑之流行。今亦國家所代，有豈藿食之能謀。今願陳  
情於牧守，引姑孰而胥眈。今相石城以如環，曰楚封之  
匪遐。今究南霸於造端，領皇風於東晉。今尚司馬之維  
翰，蹠黃阜之峨峨。今介凌歊，其以軒討遺音於白紵。今  
謫志譽於龍山，忽處仲之逆枯。今弔蘇子之不咸，昔戴  
威而滿頭。今竟提禍以揮，揮維長綃於牛渚。今聞水族  
之多奇，抑神鼎所未備。今孰然犀而照之，厥幽明之永

絕兮何所當而要期反予駕於長坂望枯園而容裔陟  
葛陽之修嶺考慈姥之故地形崛欽而迤嶓外儻莽以  
優邁託鐘籠於其巔兮得簫管之上器日晡霽其將下  
兮指新林以取塗茂出輿而舒疊兮遂將車而入虛何  
累累之相似兮無松楸以植塋匪京觀而若斯兮迺鬼  
雄之孤墳昔島夷之狂戾兮數取羸於一伍短兵接以  
當目兮躡余行而若僂馬就括而飲刃兮化甲卒於原  
壘中自瘞而繚轉兮或益恤而永乖願藏心於淵兮累

軫慮以僵回蹇吾去此故土兮偏何遲而歷茲尚由庚  
以舒筴兮涉長淮之浩流慨秦金之沈隱兮虛厭勝於  
東游過新亭而隕涕兮惜晉業之不適結予轡於四望  
兮且弭節乎石頭審虎踞之曲勢兮歎防禦之阻脩臨  
段石之崔嵬兮觀石碣而志功入三山而郁郁兮何所  
建之偉鴻麥閭閻之千肆兮羅士女於五方嘻噓氣而  
成雲兮市隧別而開通噫衍流而盤魄兮既娛樂而且  
康孳貨殖以闡委兮冠蓋鬱而霑集何豪游之充牣兮



設雄觀以萬國被郊垌之四分兮當星紀於上極相承  
覽以尸存兮恢眈眈其難悉率越城而喑嘆兮追孫氏  
之所規蹈太初而容與兮放赤烏以委蛇荒楚楚而莫  
蹟兮邈蓁蓁而無蹊昭石印之詩妖兮安天塹之足恃  
亦懷土之厚固兮寧食水而之死胡詭命而豐淫兮尚  
聽咎而窒耳彼龍游而渡江兮覆厥族而何俟發臺城  
之南端兮爰思隸於嘉和越披香與五明兮聞靡麗之  
實多擢曜靈以中處兮列望僊其與璿儀傭鬼工而猶

厘兮極人巧其靡加中又實之以要眇兮二八射代而  
修媚觴玉樹以行謠兮金承趺於巢砌忽瞽眇以徊遑  
兮疑乍虧而互蔽謂恢然之嘉觀兮劇將以明得意逮  
天懟以霽怒兮地永羌而閱世予既曠長懷而遐眷兮  
復容與乎壽宮載雲旗之冉冉兮肆路轂之彭彭布几  
筵於下殿兮儼靈君之予降觀峻宇之猗猗兮規化城  
而特起紛膠盭於菴羅兮紆旁唐之玉祀帝釋之容容  
而遥集兮祥河涌而輟水尋智囊於支郎兮衍白麓之

名理橋魔鬼其焉誣兮釋大寶而殉之蔣骨青而死神  
兮國將亡則聽之繇永昌之二日兮讖泉行以九百臨  
高臺以駐足兮火酣酣於城北歷六代之代行兮不畢  
輪而易居豈據執之不預兮實伊德之逋馮天監此下  
土兮篤淮甸而龍興靈震震而若奮兮超采石以東南  
雖九隩其奄宅兮睠馴首於鎬豐遺洛食於嗣聖兮因  
輓輅而跡關中順陰陽以履極兮吹象形於紫微狹漢  
制而循周兮言彬彬而庶幾雙闕立表以嶢嶸兮闢大

夏而奠維抗高門於閭闔兮右帶江以周池廓夷塗而  
丹堊兮辟荔堦而桂蘅重襲固以城平兮洞轆轤兮其  
無垠增九筵之垓北而博敞兮世緒綺錯以綢綸辟衆  
星之拱極兮若燭陰之舒明宛雄虹之繚紹兮交風雨  
以相承神靈協而環衛兮固並建而彌新佇景望而懽  
息兮遡鼎成於軒帝大期集而升中兮肅鍾陵其永閔  
錮三泉之已汰兮酌流水以約制慌金支其開闔兮倏  
潛舉夫玉衣穆皇皇而假廟兮儼陟降以昭回樂斯丘

之委夷兮式序類於文謨保厥功於百世兮覩河洛而  
締思詠美美以上陵兮濟覆舟之在阿臨夸術之廣廣  
兮淒玄水之微風焱起於蘋末兮施白露於蒹葭澶吾  
道以北首兮酌列帝之寢園椒塗穴於狐兔兮膺牧豎  
之祭原昔千騎而從風兮鬼何窈窕而予前物有所必  
至今時有固然經川隰而周覽兮投翰其焉可詳循徵  
祖於華林兮期再畲於半陽籍王謝於烏衣兮諒溫尹  
之伐庸曲周生之匪貞兮卬卞氏之純忠邀三弄於清

溪今壯睹墅之捷淝隱典午之淪胥兮疇斯人其焉依  
緬遐想於冶城兮悠然安知其所裛徇秦淮而東直兮  
披郊園之榛中屬雌蜺之連蜷兮信休文之所考字康  
樂以其坊兮睇平原之舊墟放微志於山居兮邈延佇  
於吾廬何明哲之寡咎兮由不密以失身遙信譽於風  
菌兮遲寸晷於鶴音聲無翼而蜚蜚兮不救死於其頸  
予哀抑而芑薄兮非脩短之足愍蜩蟬厲而沸秋兮霜  
既零而木下復改策南之郭兮祖蹟靈其在宇紛炳燭

其蕭兮神哉沛而鴻祐思媒勞而弗終兮引天闕以流  
睇稽我武之肆狩兮茲承庥於游豫喬桓桓而司馬兮  
逕跋涉於天步睠河山之保界兮擘帶礪其與盟撫魏  
鄂之丕緒兮偉曹黔之飲勛馮末照於容光兮道開天  
而軼賊名履高平而顧問兮衆穀擊以成雲第宅繼以  
相望兮出清蹕而若神日佯佯其諷議兮時耀首而膏  
屑寤疾歌以牛下兮粲爍火之星難鴻遼遼其未央兮  
冀異州之上賢輕微命於尚臬兮中抱惜而含隱有仇

儼而啜泣兮神宇漠而棲憤援桂枝以招招兮揚不流  
於束楚天地際而往復兮尚德載而既雨信服膺以修  
姤兮何曾思其顛顛廓獨處而不憚兮軫芸芸之盛年  
希階天而不恁兮予胡為此邦報童觀於素朝兮誓將  
旋予舊疆邈回風而反顧兮豈我心之則降亂曰天地  
升降紛相襲兮修折之運焉可極兮習坎乘流與時息  
兮君子於行其儀一兮其儀一兮南之征吉兮

南歸賦

有序

明  
謝肇淛



萬歷辛亥之春予以屯田持節歸里水陸南北七千里  
餘其始發也楊柳未華及至三出蟋蟀居壁睠客途之  
迢遞感物華之變遷聊述所見悲喜之情以當勞者之  
歌云爾其詞曰

春莫今日良秣予馬兮郊之陽僕夫兮抗旌紛眇眇兮  
祖張樂六騏以先路兮睠故都而彷徨橫玉柱以割涕  
兮沾原隰之皇皇於是厲潞河憇黍谷徑燕津輒涿鹿  
金臺為郊易水猶綠風蕭蕭兮送寒水鳴鳴兮如哭悵

英雄兮何之空遺恨兮擊筑維時青陽弭蓋朱方載御  
殘星動野薰颺拂曙草薶靡以承輪花歲蕤而隱輅榆  
瑟瑟兮隋錢柳絲絲兮舞絮緊征鴻之嘹唳兮胡違和  
而北翥紛江離與修芷兮恐年歲之遲暮驅吾車兮兩  
河風冥冥兮吹沙麥秀兮漸漸鳥睨睨兮和歌望平原  
兮逶迤莽平楚兮蒹葭日冉冉兮濛汜稅吾駕兮齊之  
阿若乃秦碑既泐魯殿未改高臺就夷荒城猶在南樓  
縱目浮雲掩靄異代精靈為桑為海迨夫濟漯南道汶

泗西微洳流初淪呂梁載違既創巨而圖細亦逝坎而  
趨夷石礪磽而下齧山崕岼以旁圍雖建瓴而東注或  
一泄而無遺水門宵鎖雲帆晨飛乍乘駛以走坂時失  
水而塗泥川原夏兮飛鳥絕莽蒼暗兮人烟稀雲慘慘  
兮虎嘯雨濛濛兮梟啼晨火斷兮銖冷瓶粟罄兮徂饑  
戒明發兮不寐悵畏途兮何之乃遵黃淮雙流合奔天  
吳激浪馮夷噓雲渦鎖騰掣地軸爭翻曜靈東吐玄闕  
西吞飛沫千里白日為昏縱一葦之所如汎汎兮萍飄

忽而無根彼圯橋之遺履兮身帝師而彌尊感王孫於  
一飯兮懷千金而報恩何二賢之馳騁兮卒同際而異  
門眷敝屣而遄迴兮高鳥盡而茹冤苟吾冠之未挂兮  
又何為檻縶於垢氛俯千秋而灑泪兮邈共盡其何言  
清淮既濟達於廣陵和風送漿微波不興滄邵伯之遺  
埭擊楊子之洪砮錦帆烟滅離宮土崩玉觀墟兮瓊花  
盡迷樓坳兮荒烟凝銀濤萬馬而澎湃金山一柱而嵒  
峻豚涌波而晝霧鼉吐眼而宵燈蜃幻市以滅沒鯨鼓

幟以鬢髻擊中流之樹影兮風為馭而虛為憑紛南北  
之風塵兮輪蹄擾擾而未寧彼天塹之安流兮或一葦  
而可乘噫世路之湏洞兮扇微波而掀騰衆女疾予之  
娥眉兮矧重之以修能逐飛鴻之冥冥兮矢亡慕於繳  
繒乃遵毘陵沿具區道錫麓望姑胥潮通震澤城抱闔  
廬悵霸圖之不卒弔忠魂其未舒金精騰而嘯虎寶業  
冷而棲烏香牒黃壤琴臺綠蕪空宮游鹿虛廊穴狐只  
今惟有西江月長照征帆下太湖若夫淼淼離離漰漰

淅淅噴雷浴天盪雲沃日西控三江東奔大澤七十二  
峯黛螺浮碧黃蘆紫茭紅蓴白芍鱸膾四腮蟹螯雙擘  
芡頭刺雞魚首銜石蔗漿杏糜菰苗芡實蜃蛤蜊蝦鱮  
鰓鰔莫不呈鮮登筵擅雋入席留舌為腴沁齒生液  
恍海錯兮故鄉欣一筯而共適於是青翰矯翼彩鷁迅  
羽榜師擊汰僊人伐鼓攬槁李之故墟靄曾樓於烟雨  
香銷秦逕魂斷鴛渚倚語兒兮孤亭懷美人兮蘿苕豔  
骨忠魂謀臣霸主飲恨吞聲同歸黃土至若吳山東峙

平湖西縈峯飛鷺嶺泉湧龍泓六橋柳色九里松聲壁  
車馳馬畫舸朱鈴絳唇紅袖錦瑟銀箏香塵霧合歌吹  
雷轟感南渡之遺事攷蘇白之所營何經始之盛美兮  
卒湛惑而用傾望思陵之玉盃兮寄遺恨於冬青紛素  
車與白馬兮歛嘽嘽其如雷霆雪山涌而東注兮莽似  
神而難名胡鴟夷之雄魄兮避疆弩而西行噫大塊之  
一氣兮固橐籥而縮盈朝息予駕於富春兮夕艤棹於  
嚴陵奔湍怒以叱咤兮硤磊齧而虺崩呼邪許以踳躐

兮飛百丈之縻絙惡南風之五兩兮羌竭蹶而難勝彼  
得時而騁駕兮疇無階而可升眷山椒之片石兮繫予  
慚於客星爾乃丹壁矐研蒼洞黝儵層灘咽號重岡合  
束劒稜攢峯練花飛瀑堪巖凹堂迴渦旋沱細雨晴飛  
慄風夏謾亞枝掠牕仍藤捲屋積潦增波衆瀨鳴谷沫  
濺城腰浪躍山腹石卵疊沙漿牙冑竹漁罾斷流樵唱  
被麓碓借水而自舂筏銜燈而還燭雞棲埒而掩茅犢  
出山而收穀信吾生之有涯羨一丘之已足於是淞溪



東窮楚岫南峙雲檣卸裝筍輿遵軌羊腸九曲以絙垂  
龍背千盤而標起資菴蒼蔚憲霽崩菴霓徑連蜺雲根  
倚旒泉界道以飛素山銜曜而凝紫野雞號兮林月斜  
驛馬嘶兮酸風起零雨兮遥遥木葉下兮靡蕪死乃度  
分水載瞻載馳灘聲鳴咽關樹依稀霞舒幔以絢采石  
折筍而昇曦橋沈虹於漢表簾噴雪於峯厓玉簡曳金  
以璀璨寶藏函縹而紛披蛾眉慵兮臺鏡老蟬蛻冷兮  
龕苔滋丹崖秋兮舟楫朽鐵笛怨兮猿鶴悲盼仙踪之

杳邈兮悵吾衣之已緇嗟王事之靡盬兮寧今是而昨  
非漉一舸於輕湍兮馱晨風之驚飛迴石罅以出沒兮  
倏犇電而莫追弔陽侯於建安兮城郭是而民稀望鐔  
津之紫氣兮胡竟合而中離扣困溪之嚴關兮榜人告  
余以岵夷邈芋江之落潮兮槳咿嘐而隨之睇枌榆之  
百雉兮意似是而復疑鬱三山之雄矗兮吾猶恐夢魂  
之幻為欣稚子之候門兮爰破涕而解頤於時長嬴既  
季溫風扇和翠旗動蕙綠蓋舒荷三逕未荒穰陰載多

高臺擎露曲池影娥竹抽寒玉松老霜柯石斑剝以繡  
蘚壁糾結而蟠蘿蜩嘒嘒於高柳鱗物躍於澄波卷六  
合之清朗今奉板輿而相過挹清芬以盈把今觀朱顏  
之微酡惜此日之不再得今舞爛斑而揚歌歌曰南山  
有廬可以棲遲河之洋洋我舟既維人生行樂爾須富  
貴何時苟余心之無營又安知檜楡之與天池

東歸賦

明  
鄭明選

余髫髻而諷詩書今嗽六藝之芳津竊鄉曲之諛聞今

利觀國而上賓舉鄉書於弱冠兮遂坎壈而逡巡屢計  
偕於南宮兮蹇余馬而迴輪淹中年而鵬奮兮肇服政  
於安仁綰墨綬之若若兮畏應宿之非人余諒不能踵  
彼宓子兮竊希蹤乎戴月垂五期而罔效兮夫何必勞  
而政拙聖皇既不余譴兮又徵余於秣陵蹠黃門而翔  
青瑣兮陪西曹於掖庭帝曰汝為耳目兮庶弼諧以謨  
明又投我以艱大兮典七萃於三營閱鵠鶴之變化兮  
簡百鍊之精兵還時事之多虞兮憂忉忉以中忤豈不

懷汲魏之高躅兮莫達吾之精誠諒負乘之匪器兮詠  
伐檀而內思登石城而侘傺兮曷不返余之初服覲北  
山之崩劣兮恐移文之余辱數與志適相遇兮俄溝疾  
而彌篤軫受使而秦思兮爲沈疴而越吟彼狐貉尚首  
其丘窟兮孰伊人之無心叩天閤以乞骸兮逝將還吾  
故林帝心愍我小臣兮縱微軀以抽簪欣景命之生還  
兮理桂楫於江湄睇長江之晶漾兮渺浩浩以瀾瀾日  
既中而西淪兮潮乍至而東歸感進退之有數兮物無

滿而不虧榜人告余以發櫂兮眷繾綣而反顧皇居赫  
以弘敞兮擁江淮之險固環萬雉之金墉兮挾龍虎而  
盤踞三吳鑰其東門兮荆蜀關其西戶非真人孰能都  
此天府兮豈六朝之能據王氣鬱以葱葱兮極吾目於  
孝陵仰神靈其如在今悵欲去而不能孔去魯而遲遲  
兮軻宿晝而不行聊徐徊以夷猶兮孰察余之中情會  
月離於南箕兮颺感粟而颺飄陽侯盱眙燦以怒兮天  
吳驤首以超超中流關其無人兮鱗鼓浪以旬旬思臨

深之有戒兮余安敢乎徼征縹余舟於燕磯兮騁余目  
於郊關指直瀆而輟祖龍兮誕望氣於東南發赭衣之  
胥靡兮紛絕地而開山逞虎視而蠶食兮據上游於殽  
函任斯高以播虐兮隱黔首之傷殘子嬰歟以面縛兮  
歸百二於龍顏望牛渚之洪濤兮噴澎湃以砰礚謝微  
服以宵游兮泛素月而擊汰宏慷慨以詠史兮發歌聲  
之清會歡邂逅以同舟兮語中旦而不寐嗟知音之實  
稀兮迺締交於傾蓋晚采石之斷齧兮慕青蓮之丰神

被宮錦以煥爛兮傲四顧其無人憾貂璫之貝錦兮蒙

挫衄於太真夜郎飄以遠竄兮胡才豐而命屯訪丘隴

於青山兮惟葛藟與荆榛晁風濟而揚舲兮夕吾逗於

真州胥挾弓以逃吳兮茲濟江而亂流遭擊絮之姦女

兮發簞飯以相周戒壺漿之勿露兮思追騎之我求女

自沈以滅口兮從宓妃以遨遊雖慷慨以赴義兮亦輕

生之足尤淠采鑄於銅山兮金錢物於九野首開釁於

爭博兮載裂帑於削土連菑川而結濟南兮引二膠而



糾趙楚偁几杖之寬仁兮仰射天其何補竟獸挺而胤  
竄兮身與首而異所南吾覲彼句曲兮抗薄天之高峰  
標洞天於道錄兮緬仙聖之所鍾懷三茅之靈宅兮企  
二許之玄蹤華陽黜以康良兮閔玉簡與金龍嗟余嬰  
此沈痼兮希至道而莫從俄歷舟於金山兮聳孤秀於  
江之門水淘山而不動兮山過水而彌奔龍池漱灑而  
上浮兮鵲峰磈礫而後蹲化塔耀日以矐睽兮琳宮躍  
波而吐吞汲中泠之靈泉兮信水晶之獨尊焦岷嶽以

對峙兮嘉逸民之肥遁丁炎精之式微兮獨泥蟠而無  
悶凌霜雪以袒露兮雖焚廬而不困躡赤霞於物表兮  
詎軒冕之足溷余何為乎偏側兮綿遺廟而心懣並鐵  
甕以結纜兮吾將馳目於南徐陟北固之巖嵒兮命僕  
夫以腰輿狠石怒而欲立兮懷兩賢之躊躇操提兵以  
東下兮何樓櫓之紛如痛組甲之百萬兮瞥灰滅而無  
餘余既窮江行而入雲陽兮悼齊梁之陵墓金牛巉巖  
其尚存兮石麟湮滅而莫覩呂城化為林薄兮郗壘宅瓦

於狐兔惟是王公貴人兮偕草木以物故冀榮名之終  
古今曾不得埒於朝露指毘陵以進道兮翳泰伯之故  
都曰剪商其非義兮盍屏跡於海隅抗三讓之高節兮  
違幽岐而竄勾吳豈不醜斲髮而鄙文蛇兮與魚鼈而  
為徒苟求仁其得仁兮亦何陋乎蠻貊札能承此先德  
兮輕千乘於敝屣願附節於子臧兮羶何為而及已魯  
審音以知樂兮齊葬子而叶禮脫縞帶以定交兮解寶  
劍而酬死宣聖為之太息兮款有吳之君子瞻春申之

祠屋兮洵義重而功高却秦兵而歸楚質兮封吳邑以  
報勞濬申浦之水澤兮發黃田之土膏城郭既已圯兮  
賓客又已彫雲晻曖於慧山兮髣髴乎俠氣之未消虎  
丘宛其在前十兮封闔閭之玄宮冶銅槨以為錮兮翮玉  
鳧之翱翔上有劒池之崩峭兮下有扁諸與魚腸雖塵  
埋於九壤兮猶燿燿以騰光虎一去而不守兮弔伯業  
之茫茫迤邐放乎閭門兮駭列肆之鱗鱗商賈紛其如  
雲兮窮水陸之奇珍粥江珠於淵客兮輸海市於實人

人雜還以摩肩兮騎凌亂而揚塵冠東南之奢汰兮孰  
返朴而還淳尋玉女之高墳兮既惆悵而芒芻恥蒸魚  
之見辱兮哀朱顏之殞越攜金鼎而同埋兮佩珠襦而  
共沒鶴舞市而鷓鴣兮殲生人而殉死骨湛盧憤而夜  
飛兮感神物之超忽眄重圍之峨峨兮喟夫差之昌披  
左既擁夫鄭旦兮右抱以西施謂款段為速兮謂雞斯  
為遲忘六千之越甲兮徒爭長於黃池嚼龍稻而三呼  
兮固雖悔而易追五湖綿亘於三州兮稟咸池之靈氣

山錯落以星布兮出沒於波濤者七十有二洞庭歸然  
最高兮夾東西而雙峙禹胼胝而底定兮垂明德於萬  
祀探林屋之金簡兮亦徒聞乎牒記眺鱸鄉之高亭兮  
復縱權於吳淞三江揚沸以飲雪兮飛梁蜿蜒而垂虹  
胡烏喙之猜忌兮螽蟊變名而徂東祖計然之餘策兮託  
廢著於齊邦三散金於親族兮杳不知其所終越鶯脰  
之重湖兮盼舊鄉之咫尺久羈旅而無聊兮歸心近而  
愈急趣黃頭以齊榜兮曾不可以終日見似人而猶喜

今矧吾還乎故宅山歛容以要余兮樹依依而如昔親  
戚候於道路兮慨余容之枯瘠雖申之以慰藉兮終握  
手而心惻城郭非吾所樂處兮爰屏跡於衡山負翠巘  
以為障兮周碧溪以為環既息肩而弛擔兮與世事而  
相捐傍漢陰以抱甕兮避於陵而灌園歲魚羔以供伏  
臘兮輸餘稅於薄田玩羲文之奧旨兮誦蒙莊之寓言  
守恬淡以無為兮采衆妙於玄玄苟二仲之不我遐兮  
聊相與乎倘佯或抱膝以舒嘯兮酌麥醴而無荒夫孰

知拘拘之為苦兮吾將委運於彼蒼內惟余之涼德兮  
固福過而災生悟四大之假合兮雖疾病其何傷毅高  
門而內熱兮豹攝生而外戕匪人力之可營兮將何去  
而何從齊天地於一指兮會空色於兩忘抱清靜以獨  
立兮超萬古而久長

南觀賦

有序

明  
田藝蘅

觀之時義大矣哉易曰大觀在上下觀而化是以二三  
以童闕見譏九四以用賓致美良有以也况人文化成



小畜懿德又君子之所有事者乎余宿鄙丘樊幼歷湖海再客白下遂作南觀賦焉賦曰

己未之冬陽生之月田子應聘修文遊橈將發指金陵而遐征實龍飛之舊闕於是囊短劍束祕書乘符傳辭郊墟艤北闕而待渡富水衡之權儲資國課於商賈嚴緡算於舟車感古者之不征何後世而侵漁始作備於壟斷終貽禍於河渠惟聖王能崇乎節儉斯窮旅皆悅乎行居迺揚舲於通津兮瞻臯亭之峻極拱龍鳳於錢

塘兮賴茲山之阨塞慨南宋之陽九兮駐腥膻於叢棘  
襯壁忽其出降兮甘辱身而亡國挂清飈於塘棲兮泊  
殘月於崇德雞犬荒而悲鳴兮人民敝而菜色丁海防  
之廢弛兮縱島夷於邦域既復隍而屠邑兮孰能殉乎  
社稷石門鎮破秀氣橋危吊宗公之孤節想將軍之雄  
姿捐軀死戰絕糧覆師烈哉壯士巍乎新祠方皇祖之  
龍鬬兮士誠曾於此乎興尸何天兵之威猛兮俘六萬  
之吳兒固仁者之無敵兮亦開平之玄機苟攻守之有

制兮雖衆寡其何為豈人謀之不臧兮抑天運之盛衰  
經萬壽之小山兮為春秋之樛李當吳越之紛爭兮干  
戈日以披靡畫語溪以正疆兮亭柴辟於長水卒臣妾  
其魚肉兮奚屑齒之足恃臨嘉禾之舊館兮登烟雨之  
虛樓汎鴛湖而澄慮步龍橋以解愁訪死亭之故灣榜  
人道余以寒湫笑丈夫之未際兮為妻妾之所羞既忍  
辱於負薪兮又何恥於歌謳俄除道於會稽兮悔覆水  
之難收賢敗絮之嘉匹兮懷薄笨之好逑望松陵以扣

舷兮傍垂虹而救楫懷神禹之荒度兮立功於焉而始  
集駭震澤之底定兮由三江之既入拯下民於魚鼈兮  
瑞帛紛其來輯仰三忠與三高兮出處邈乎其莫及眺  
鱸鄉之孤亭兮清風瑟瑟如其可挹晨雞鳴於練瀆夜烏  
啼於姑蘇賢太伯之三讓逃文身而建都歎麋鹿之荒  
臺招西施於五湖弔子胥之屬鏤訪伯鸞於吳趨方懷  
古其未已兮省近事於周吳元祚紇其不綱兮咸揭竿  
而長呼何么麼之張四兮亦蟻聚夫鹽徒睨神器而不

量兮嚴南面而稱孤煩王師之再下兮宗社卒以就屠  
信天命之有歸兮終混一乎輿圖亦有蹲虎之丘走狗  
之苑石池水陰長洲日晚許豎之關未開寒山之鐘已  
遠復稅及於艘艤益嗟客行之偃蹇迎寒潮於無錫實  
勾吳之始封在漢初而金殫固無事乎崇墉晒天祐之  
竊據假虎翼於元兇過延陵之故墟仰李子之芳烈紹  
至德於宗賢附高節於往哲欲挂劒於荒丘痛知音之  
久絕朝發毘陵兮夕宿呂城依然顏垣兮雄哉子明遏

孟津之橫流兮為京口之要營觀海夷之殘破兮追千  
載而傷情拾笈丹陽攬轡句曲山川平行原野膏沃豁  
我塵襟攄我曠矚禮茅山之白雲想三君之如玉雲陽  
古驛高橋廣阡古之建業今之應天湖海內控江淮外  
連列吳蜀為門戶殷閩廣為市廛龍虎蟠踞兮武侯已  
發其秘經營根本兮道子足知其玄是以禹貢維揚州  
之域天文實斗野之躔楚威埋金以鎮其地秦始鑿山  
以通其川孫武成鼎足之勢東晉續永嘉之傳六朝因

之而迭霸南唐據之而偏安迨乎至元之革命始洩王  
氣於千年方我太祖皇帝之龍興也奮濠梁下采石克  
太平延儒碩首納陶安之謀遂成定鼎之策惟大是圖  
非中是宅惟重是居斯輕是役奠燕翼之丕基朝侯王  
之嘉璧蓋繼天立極者三十有五年而聖子神孫復遷  
於燕陌也兩京並建留都實隆在殷維亳在周維豐郊  
壇陵廟舊內故宮隱隱賑賑鬱鬱葱葱衛以百司鎮以  
上公允文允武自西自東其中則天市三垣紫微帝室

玉殿屯霞朱門暎日御溝融融苑樹秩秩龍漏深沈魚  
鑰秘密其次則直廬星拱翼衛雲翔貂蟬奕葉紱冕輝  
煌街衢坦直祠宇低昂珍藏四裔族間五房其南則帶  
以長淮峙以牛首朱衣秦開雙闕天剖向陽明以照臨  
享百粵之奔走其北則涵以玄武枕以鍾山黑龍隱躍  
玉澗潺湲會岷峨之督脈掉虵尾於荆蠻其東則赤山  
龍遊婁湖汪濊瀾接滄溟根連泰岱掣三吳於左肱悅  
神烈之攸在其西則石頭險固大江靈長百二天塹千



里金湯馳桐柏而一瀉砥金焦而相望遵山河而膠流  
兮固美哉之天府總鴻纖之規畫兮皆聖謨之藻斧風  
流文物蔚乎其未泯兮獨冠映乎今古慶小臣之南征  
兮昭日月以狂瞽凌晨風而排閭闔兮監管窺於寰宇  
亂曰幼志超軼在蓬桑兮弱冠遠遊眇四方兮使於金  
陵懿文章兮跋涉險阻感興亡兮王猷伯畧兩茫茫兮  
登高斯賦比興長兮君子尚賓觀國光兮大鵬圖南聊  
相羊兮

航海賦

明 蕭崇業

句町癡人奉命中山之役戒艘於閩有鏡機子儼然造  
曰蓋聞寧俞竭力事主艱險不避人謂之愚汲黯數好  
直諫難感以非史稱其戇何故名癡豈有說邪癡人良  
久不言乃莞爾而笑曰僕鄙野之人僻陋無心胡敢當  
二賢也顧即之時事驗乎物情名亦有自來矣且夫乘  
人鬪捷智者相傾而任理直前則愚之所以優於械也  
隨俗脂韋諛者相和而秉德持閑則戇之所以不為佞

也茲者微寵靈以航異域其孰敢違彼佻者避猶枉  
桔萌萌者坦若康莊詭蔓飾隙遠脫冥翔見幾之作我  
則未遑是以觀者訝其辨之不早衆故譏其癡而無量  
耳鏡機子爽然自失曰若可謂安義命而篤於自守者  
也癡盍足病哉書曰若濟巨川用汝作舟楫又獨不聞  
犯斗之奇邪第今時世日益澆已顧安所得植也者而  
乘之若惟單精畢力以造萬斛之舟意者其有濟乎於  
是癡人唯唯遂命工師求大木程之以有司督之以當

路閱彼閩山礫危黝霍蓊參輪茵連抱後矗夭嶠間珂  
蔚若鄧林彌皋欂阜陰谷蟠岑攢鬱叢駢朗晝盱暝尊  
磊磊其上覆森落落而刺雲爾其考制掄才凌巒超壑  
移兵走檄滌藪摧壘松樟采於劍之津鐵力貿於嶺之  
表鉅不厭脩細罔遺小是斷是遷載堅載好凡既備矣  
大工斯肇於是覽易爻思象旨儀工倬法虞姁考日力  
之程較費務之紀問軼事於故游鳩黎人以經始離朱  
督繩班輸削墨殊裁潤之時宜槩度稽於往牒定豐約

以執中酌文質以立則雕土豈效乎務相歛木用擴乎  
古哲為梁遠陋夫絳檐涉川無取於瑤櫺扛鸞參梳交  
簷合鼎穴牖梯艚副枕重底飛廬翟室望之如宇其上  
則有形宮鏤像藻樞華棖璇函綺櫝睿製瓊章錫衣命  
服皮弁纁裳玄冠盤綬玉佩鏘鏘屏金麟紫帟烏斯皇  
繁總冰紈緯羅束帛連烟之文獨繭之色凡夫取竭天  
產發輸人迹為九賦之所斂九式之所節者是用傳宣  
乎會極之門遠頒乎來王之國其次則有文旒莞弱毛

席毼毼鉸缶七匙壽光水器蘭膏朱火貴燭金羊炊釜  
篋絨彝卣屏面甌甌陶素裛繡編連鹽酪豉薪唾壺獸  
子綢杠絳縵組帷流蘇舊旆颺悠以容裔羽旌騷殺其  
紛如材官畜用利械兼儲脩鍛延鏃銛戈利及佛郎鳥  
嘴暘夷勃盧大屈之弓綦衛之矢谿子之弩越女之劍  
龜蛇之旂烏隼之襖軍容翼翼豫戒不虞若乃弘舸巨  
艦非常可模抗指南之暉煜崇五樓之崢嶸運貨狄共  
鼓之巧使盡變化乎其中是故外闊內虛大人度也陽

行陰翕方壺境也畫鷁琢雲等威異也虬螭螭螭橈櫓  
擊也鷹瞬梟矚力士從也嶠峩峩峩蔡戟列也鳶翔鵠  
逸麾蓋張也蔽天翳日帆揚而縵移也流霞掣雷銀黃  
飾而赭漆光也震霆轟輦鉦音草響也舞鸞律獄鳥韻鳥  
部蛙鈞天角抵繽紛錯集者殊倆薄伎散襟期也若乃  
推驗天文審測風日星醫卜算羽祝庖丁匠氏縫工調  
人司救象胥掌訝篆鏤丹青與夫吳歆蔡謳阮嘯孫吟  
曹詩劉飲秋奕嵇琴陶泓毛穎陳玄楮生儼然數客述

古刪今以至解難之凡杯肘之射棘猿之術雕龍之英  
靡不廣詢博取競爽攄能爾其大雖謝於馳馬制實邁  
於採菱庶幾御長風以利往責千里於寸陰乃若梁麗  
晉舶越舩蜀船沙棠木蘭之稱青翰三翼之名方斯茂  
矣於是遴長年齊三老命先期以諏辰輒開舟而出塢  
士庶佇眙觀者如堵冠裳雜遝紛餞於祖導魚須負矢  
弩會候亭循舊矩割獻鱸羞燔脯酌醴酬觴鳴金伐鼓  
揮絲競肉移宮換羽歡溢廝興禮殷客主僕馬輻湊譬



風行雨散衆繆於南臺之許爾乃揖讓辭筵慷慨升車  
祀天妃於厂石初縱輦於梅花臨萬頃之濤蕩杳莫窺  
其津涯覘五兩以爲表指六合而爲家仗皇威之遠庇  
託靈胥而自誇遂竦節而結旅忽輕舉以征遐高宇澹  
乎其若寂大塊恬然其不譁映流光以霽色照落景而  
俱嘉窮區沒渚而不見萬里藏岸其何遮泓澳信難測  
之於蟲林茫無足語之於鼃爾乃順颿鼓帆凌波驟舳  
不行而固不至不疾而靡不速罔然若翔雲絕嶺之翼

倏乎如馳隙遺風之足陋登仙以矜榮擬乘楂而彷彿  
此非海外之壯遊人世之奇矚也耶若乃陽侯磅礴以  
跳沫天吳激礪而鼓濤飛滂消湔以相湓洪濶匍匐而  
互洧轉天輪而顛戾迴地軸而爭撓駭駭乎嵩衡抗從  
礪錯乎雷澍叫號急急泫泫則星河似覆澈澈潏潏則  
日月如搖篙工於是乎謹柁楫師於是乎弛綯當此之  
際末可如何雖馮虛以御風兮境非赤壁縱遺世而獨  
立兮心異東坡有時乎竦帽戰怖無日乎爽曠婆娑恍

千態以萬狀怵談笑而起戈須臾久於年歲瞬息慮乎  
風波有車馬行公無渡河繇斯以譚則知郭景純之所  
賦者特泊泊之見未習夫江漢之委輸也木玄虛之所  
云者乃想像之言猶未覩夫灝漭之實際也故嘗嗟徐  
衍之負石怪精衛之塞溟壯荆飛擒蛟而成氣賢夏禹  
眎龍其弗驚若乃陳茂拔劍事偶然耳海童邀路其誰  
忘情夫是以仰舟中主敬之程子悟過風思過之管寧  
坐而待旦動與懼并行無轍迹止無所憑鬱鬱墨墨兮

衆心懍懍搖搖惺惺今我頭岑岑逡巡數日乃始達於  
其境於是世子遣文武之臣駕雕輅驂驪駟坐組甲建  
旗常扈烏號翹干將羽騎飛蕤金戈耀鉉旄結左言之  
渠鏤膚鑢髮之行焉颯驚捷舞蹈趨蹌前驅騁路盱眙  
自旁覩漢官之上儀咸輟咍以振踴慶千載之嘉會愈  
色澤而神竦亦有靡聞不來無見而拱周環羅列盤辟  
舉踵於是盛禮興樂供帳設乎皇華之庭夙駕具而贊  
典紛呼嵩以祝齡僚侏兒離於焉俱集四夷迭奏昭德

之馨爾其尚之以金章加之以玄服戴纁垂纁拖綏鳴  
玉變左衽之陋風襲中華之芳躅御纂組於公庭告先  
公於祠屋追養之禮殫受終之儀肅齊虎拜於部夷稱  
霞觴於宗族然後捧綸章留琳牘奎翰輝煌寶書雲煜  
爾乃稽首頓首颺言曰明明天子萬壽無疆者也於是  
命膳夫以大饗爰致敬於使臣滌濯孔嘉禮儀振振載  
之以醪醕設之以豆登豐之以饗餼介之以芳芬館舍  
之所問候緝御之所頻仍佳勝之所賞玩筐篚之所錯

陳淹藻景於二時篤隣好而常新卻裒蹄之厚餽堅不  
辱於遠人爾其鉅典既畢涉冬始歸潢滉浮空旋亦如  
之傷心極目裊望僮拘風帷兮寒削月帳兮淒嚴蔦玄  
英兮換節迅金素兮迎年狂瀾迴兮漸以遠駕飛航兮  
俄還安危值於所遇變幻殊乎目前而出坎履順殆有  
鼓歡聲而振天者矣緬惟鄉之所謂神藥形如股弁背  
芒惴惴然而莫知所營者果虛邪實邪抑虛者舟邪實  
者我邪誰虛誰實誰我誰舟蓋譬猶空中之態夢中之

境物物皆遊物物皆觀耳彼有認水為海認陸為岸乃至認我為我卒相角逐而不已者得無障乎於是閩之耆老士大夫縉紳先生之徒因不掀顏慰勞深喜其獲終王命以為邦國重也是時鏡機子亦在賀中顧獨出席盱衡而誥曰猗與偉哉癡人固能蹈海哉昔者子路喜桴海之從聖人抑其好勇廣德執乘船之諫賢主嘉其直言禍福所倚幾希之間此招賈之文誦者悚焉若幸免於風波之危而克如期以竣事也詎非有相之道

歟第嘗聞之識治體者在脩文德以服遠尊中國者不  
割齊民以附夷茲緣蕞爾之小邦而乃奉先人遺體冀  
倖魚龍之牙吻徒取彼重蒙竊惑焉癡人憮然有問曰  
客故習夫絃議乎儻若所諭適足以明其闇於全而振  
乎瑣膠拘謗之忌而未覩其恢恢者矣何則忘九澳之  
藩屏而不以邊陲為襟帶者乃曲士之井矚也偷特祿  
之苟安而齷齪以避險崎者非達人之所壯觀也古之  
帝王陋偏據而規小恒宅中而圖大掩畧八極靡國弗



營既尊居乎神州之卓犖尤勤務於鳥獸之外氓北出  
名師南馳信使輜車朱軒絡繹不絕樓船戈舫紛沓旁  
午然皆弗克遺顯號於後世傳土地於子孫方今聖明  
在宥感德房皇九域謐如四封不聳遼絕之黨冠帶之  
倫樂貢效贄者蓋以億計琉球濡浸潤歷年滋多其  
奮濯泥滓比埒箕子之邦豈與夫烏許狼脍屠婆縛婦  
奇肱反膝之首交脛長臂之種可同年而語哉客倘願  
聞若說請為左右揚摧而陳之夫琉球者上古所不能

化秦漢所不能從考之四隈則大荒之外測其封界則  
閩粵之東遠望蓬桑則曜靈晰逸晨霧晦蒙琴高影響  
而化幻犢配綽約以昌容旁睇島夷則朝鮮網絡越裳  
蔓引渤泥迢遞以乖闔蘇祿牢羅以互亘其苑囿則儼  
峰幽嶼秀起特出嵯峨降屈中州所慕其草木則石帆  
鳳尾紫絳綸組抗莖敷萼布濩皋丘其魚則有吞舟吐  
浪擁劍琵琶蜂目豺口狸斑雉軀奇形殊類胡可勝圖  
其蟲獸則雄螭負黿王虬海月繡螺綺貝土肉石華詭

桀出錄環異無書其禽鳥則爰居避風大鵬垂天英眸  
縹翠瀑漢灑珠往來喧聒集若霞鋪其宮室則木無彫  
鏤土僅白盛重闥連閨去泰去甚歡會作門漏刻聽政  
殿曰奉神名義斯正迺設官僚授之以柄察度司刑耳  
目司問王親是崇亦有賜姓通事長史爰以將命茫茫  
羣醜此焉則勝海濱之風茲亦等競是故賦倣井田歷  
遵正朔橫盜無斬關之慘墨吏免椎膚之虐攘雞何有  
於軻書捕蛇不聞於柳說則閭閻樂業有餘嬉也醇醲

馴致憲度漸陳教亦崇乎釋氏詩頗效乎唐人美聲名  
而遣學精奕數而絕倫歲時無須於視草觸體豈聚於  
王城則傳誌綿邈自覆瓿也物貢所產器貢刀錫胡椒  
蘇木硫黃怪石降香櫟子豐苞重驛望日而趨間載而  
至則尉佗倨傲不足云也邇者東鯁即序西傾順軌交  
南懷化漠北跂指織路駢衢梯山櫟水獻名琛於殊隣  
出瑰琰於冥壘冀積壤崇膚赴全舉而稱臣入侍之輩  
相與充斥乎藁街之邸天子於是弘王者之無外撫胡


越之一家命鞀屨以掌音設舞任之舞曲以娛五戎之  
君以睦八荒之狄駕長策於習爽廣博施於疏逖常武  
輯嘽嘽之旅小戎埋麟麟之跡三五為之跨踰八九為  
之韜軼禎符之所偉兆鴻鉅之所畧奕合在於此矣然  
則琉璃雖遠豈其得而棄之四牡雖勞又惡可以已之  
且夫兼容并包者英辟之宏略也布德宣譽者臣子之  
急務也故漢皇馳域外之議博望不辭勩於月氏隋帝  
採殊方之俗朱寬久銜使於海國值斯之勤農夫輟耰

紅女寢機士馬創吮鉞而癰耆老弱傷嚴鏃而蹂踐遐  
氓為之震竦黔首蒙被其難而邪行橫作侵犯邊境者  
猶不可殫紀矧朝廷純茂夷夏熙恬游原於邇陋泳沫  
於迴闊寰海之外有不喁喁嚮慕中國者則鮫人竊嗤  
之為士而不稱引帝德如之何其不叫呼於芸夫且僕  
以汎剽之弱幹荷郅隆之倬典方謂無異螳螂之臂客  
奈何獨以宗元之招賈者懼懼然相恐也已事而盤幸  
無談虎哉於是鏡機子柔氣汗辭而謝曰斯事體大固

膚淺所不能備也降階捧手欲讓而行癡人曰復位僕  
授而以航海之詩其辭曰於皇帝德暨四方兮中山請  
命厥惟常兮天子曰俞爾宜王兮錫以弁冕黼及裳兮  
赫赫詔敕使臣將兮布帆無恙神所襄兮一人有慶率  
土康兮本支百世熾而昌兮

御定歷代賦彙補遺卷十九





總校官庶吉士臣張能照  
校對官庶吉士臣章宗瀛  
膳錄監生臣沈 斌